





舊五代史卷一百二十一

宋門下侍郎參知政事監修國史薛居正等撰

周書第十二

列傳一 后妃

太祖聖穆皇后柴氏邢州龍岡人世家豪右太祖微時

在洛陽聞后賢淑遂聘之

東都事略張永德傳云周太祖柴后本唐莊宗之嬪御也

莊宗沒明宗遣歸其家行三河上父母迓之會大風雨

止于逆旅數日有夫走過其門衣弊不能自庇后

見之驚曰此何人耶逆旅主人曰此馬步軍使郭雀兒

者也后異其欲嫁之請于父母父母患曰汝帝左右

人歸當嫁節度使奈何欲嫁此人后曰此貴人也不可  
失也囊中裝分半與父母我取其半父母知不可奪遂  
成婚于逆旅中所謂太祖壯年喜飲博好任俠不拘細  
郭雀兒即周太祖也

乾隆四十九年校刊

書

三

列傳



行后規其太過每有內助之力焉世宗皇帝卽后之姪也幼而謹愿后甚憐之故太祖養之爲己子太祖嘗寢后見五色小蛇入額鼻間心異之知其必貴敬奉愈厚未及貴而厭代太祖卽位乃下制曰義之深無先于作配禮之重莫大于追追朕當宁載思撫存懷舊河洲合德猶傳苻菜之詩媯汭大名不及玳瑁之貴俾盛副笄之禮以伸求劍之情故夫人柴氏代籍貽芳湘靈集慶體柔儀而陳闕翟芬若椒蘭持貞操以選中璫譽光圖史懿範尚留于閨闈昌言有助于箴規深惟望氣之艱彌歎藏舟之速將開寶祚俄謝璧台宜正號于軒宮俾

潛耀于坤象可追命爲皇后仍令所司定諡備禮冊命既而有司上諡曰聖穆顯德初太祖神主入廟以后祔于其室

淑妃楊氏鎮州真定人父宏裕真定少尹

東都事略楊廷璋傳父宏

裕少漁貂裘陂有以二石鴈授之者其翼一揜左一揜右曰吾北岳使也言訖不知所之是年生女爲周太祖淑妃明年當河朔三鎮全盛時所屬封疆制之于守帥

生廷璋

故韶顏美媛皆被選于王宮妃幼以良家子中選事趙王王鎰張文禮之亂妃流離于外唐明宗在藩錄其遺逸安重誨保庇妃家致其仕進父母卽以妃嫁于鄉人石光輔不數年廢居太祖佐漢之初屬聖穆皇后棄世



聞妃之賢遂以禮聘之宋史楊廷璋傳有姊寡居京師周祖微時欲聘之姊不從令媒氏傳言恐逼姊以告廷璋廷璋往見周祖歸謂姊曰此人姿貌異常不可拒姊乃從之孤宜家內助甚有力焉晉天福末卒于太原因畱葬于晉郊廣順元年九月追冊為淑妃太祖凡一后三妃及嵩陵就掩皆義陪祔時以妃喪在賊境未及遷定世宗乃詔有司于嵩陵之側預營一冢以虛之俟賊平即議襄事顯德元年夏世宗征河東果成素志焉妃兄廷璋蚤事太祖即位累歷內職出為晉州節度使皇朝撫運移鎮邢州又改鄜州受代歸闕卒于私第

貴妃張氏恒州真定人也祖記成德軍節度判官檢校

兵部尚書父同芝本州諮呈官檢校工部尚書事趙王王鎔歷職中要天祐末趙將張文禮殺王鎔以鎮州歸梁莊宗命將符存審討平之時妃年尚幼有幽州偏將武從諫者駐旆于家見妃韶令乃為其子聘之武氏家在太原太祖從漢祖鎮并門屬楊夫人以疾終無何武氏子卒太祖素聞妃之賢遂納為繼室太祖貴累封至吳國夫人漢隱帝末蕭牆變起屠害大臣太祖在鄴都被讒妃與諸皇屬同日遇害于東京舊第太祖踐阼追冊為貴妃發哀故世宗有起復之命世宗嗣位以太祖舊宅即妃遇禍之地因施為僧院以皇建為名焉



德妃董氏常山靈壽人也祖文廣唐深州錄事參軍父光嗣趙州昭慶尉妃孩提穎悟始能言聽按絲管而能辨其聲年七歲遇鎮州亂親黨羈離與妃相失潞州牙將得之匿于褚中其妻以息女不育得妃憐之過于所生姆教師箴功容克備妃家悲念其兄瑀諸處求訪垂六七年後潞將入官于朝妃之鄉親頗有知者瑀見潞將欣歸之時年十三妃歸踰年嫁爲里人劉進超之妻進超爲內職及契丹破晉之歲陷蕃歿焉妃嫠居洛陽太祖楊淑妃與妃鄉親平居恒言妃賢德太祖從漢祖幸洛因憶淑妃之言尋以禮納之鼎命初建張貴妃遇

禍中宮虛位乃冊爲德妃太祖自聖穆皇后蚤世以來屢失邦媛中幃內助惟妃存焉加以結珮脫簪率由合範廣順三年夏遇疾醫藥之際屬太祖克海之征車駕將行妃奏曰正當暑毒勞陛下省巡明發宵征須人供侍司簿已下典事者各已處分從行太祖曰妃疾未平數令診視此行在近無繁內人及太祖駐蹕魯中妃志欲令內人進發中使往來言之太祖手敕鄭仁誨曰切慮德妃以朕至兗州行營津置內人承侍緣諸軍在野不可自安令鄭仁誨專心體候如德妃津置內人東來便須上聞約住或取索鞍馬不得供應如意堅確卽以



手勅示之既而平定兗州車駕還京如疾無減俄卒于大內時年三十九輟朝三日如長兄瑀以左贊善大夫致仕仲兄元之季兄自明皆累歷郡守

世宗貞惠皇后劉氏將家女也幼歸于世宗漢乾祐中世宗在西班后始封彭城縣君世宗隨太祖在鄴后留居邸第漢末李業等作亂后與貴妃張氏及諸皇族同日遇禍國初追封彭城郡夫人顯德四年夏四月追冊爲皇后諡曰貞惠陵曰惠陵

宣懿皇后符氏祖存審事後唐武皇莊宗位極將相追封秦王父彥卿天雄軍節度使封魏王后初適李守貞

之子崇訓漢乾祐中守貞叛于河中太祖以兵攻之及城陷崇訓自刃其弟妹次將及后后時匿于屏處以帷箔自蔽崇訓倉皇去后不及遂自刎后因獲免太祖入河中令人訪而得之卽遣女使送于其父自是后常感太祖大惠拜太祖爲養父世宗鎮澶淵日太祖爲世宗聘之后性和惠善候世宗之旨世宗或暴怒于下后必從容解救世宗甚重之及卽位冊爲皇后世宗將南征后常諫止之言甚切直世宗亦爲之動容泊車駕駐于淮甸久冒炎暑后因憂恚成疾顯德二年七月二十一日崩于滋德殿時年二十有六世宗甚悼之既而有司



上諡曰宣懿葬于新鄭陵曰懿陵案世宗有兩符后其  
 弟也入宋稱符太后是書不為立傳未免闕略五代  
 史補世宗皇后符氏即魏王彥卿之女時有相工視之  
 大驚密告魏王曰此女貴不可言李守貞素有異志因  
 與子崇訓娶之禮畢守貞甚有喜色其後據河中叛高  
 祖為樞密使受命出征后知高祖與其父有舊城破之  
 際據堂門而坐叱諸軍曰我符魏王女也魏王與樞密  
 太尉兄弟之不若汝等慎勿無禮于是諸軍聳然引退  
 頃之高祖至喜曰此女于白刃紛拏之際保全可謂非  
 常人也乃歸之魏王至世宗即位納為皇后既免河中  
 之難其母欲使出家資其福壽后不悅曰死生有命誰  
 能髡首跣足以求苟活也母度不可逼遂止世宗素以  
 后賢又聞命不以求苟活也母度不可逼遂止世宗素以  
 史臣曰周室后妃凡六人而追冊者四故中闈內則罕  
 得而聞惟董如符后之懿範亦無愧于彤管矣案是書  
 傳攷五代會要云周太祖第三女樂安公主為漢室所  
 害廣順元年二月追封至顯德四年四月又追封莒國

長公主第四女壽安公主降張永德廣順元年四月封  
 至顯德元年封晉國長公主第五女永寧公主廣順元  
 年九月追封至顯德四年  
 四月又追封梁國長公主



舊五代史卷一百二十一

舊五代史卷一百二十一攷證

周列傳一太祖聖穆皇后柴氏傳邢州龍岡人 案龍

川別志作魏成安人

淑妃楊氏傳妃兄廷璋 案東都事略廷璋係淑妃之

弟續通鑑長編亦云廷璋有姊爲周太祖妃俱與是

書異



舊五代史卷一百二十一攷證

舊五代史卷一百二十一

宋門下侍郎參知政事監修國史薛居正等撰

周書第十三

列傳二 宗室

剡王侗太祖子初名青哥漢末遇害太祖卽位詔贈太尉賜名侗顯德四年追封

杞王信太祖子初名意哥漢末遇害太祖卽位詔贈司空賜名信顯德四年追封

案太祖諸子蚤歲遇害本無事蹟原本過于簡略疑有刪節今據歐陽史家人傳云初帝舉兵于魏漢以兵圍帝第時張貴妃與諸子青哥意哥姪守筠奉超定哥皆被誅青哥意哥不知其母誰氏太祖卽位詔故第二子青哥贈太尉賜名侗第三子意哥贈司空賜名信皇姪守

乾隆四十九年校刊

舊五代史卷一百二十一 列傳



筠贈左領軍衛將軍以筠聲近榮為世宗避更名守原  
奉超贈左監門衛將軍定哥贈左千牛將軍賜名遜世  
宗顯德四年夏四月癸未詔曰禮以緣情恩以悼往知  
在友于之列尤鍾惻愴之情故皇弟贈太保何贈司空  
信景運初啓天年不登俾子終鮮實動予懷何可贈太  
衛追封剡王信司徒杞王又詔曰故皇弟贈左領軍  
遜等項因季世不享遐齡每念非辜難忘有勤守原可  
贈左衛大將軍奉超右衛  
大將軍遜右武衛大將軍

越王宗誼世宗子漢末遇害顯德四年追封

曹王宗讓世宗子顯德六年封

紀王熙謹世宗子顯德六年封皇朝乾德二年卒

斬王熙誨世宗子顯德六年封歐陽史家人傳云世宗  
皆未名次曰恭皇帝次曰熙讓次曰熙謹次曰熙誨皆  
不知其母為誰氏宜哥與其二皆為漢誅太祖卽位詔

賜皇孫名誼贈左驍衛大將軍誠左武衛大將軍誠左  
屯衛大將軍顯德三年羣臣請封宗室世宗以謂為國  
日淺恩信未及于人須功德大成慶流于世而後議之  
可也明年夏四月癸巳先封太祖諸子又詔曰父子之  
道聖賢不忘再思天闕之端愈動悲傷之抱故皇子左  
驍衛大將軍誼左武衛大將軍誠左屯衛大將軍誠等  
載惟往事有足傷懷宜增一字之封仍贈三台之秩誼  
可贈太尉追封越王誠太傅吳王誠太保韓王而皇子  
在者皆不封六年北復三關遇疾還京師六月癸未皇  
子宗訓特進左衛上將軍封梁王而宗讓亦拜左驍衛  
上將軍封燕國公後十日而世宗崩梁王卽位是為恭  
皇帝其年八月宗讓更名熙讓封曹王熙謹熙誨皆前  
未封爵遂拜熙謹右武衛大將軍封紀王熙誨右領軍  
衛大將軍封斬王乾德二年十月熙謹卒熙讓熙誨不  
知其終



舊五代史卷一百二十二

舊五代史卷一百二十二攷證

周列傳二宗室傳

案歐陽史周家人傳世宗子

七人第四子嗣位即恭皇帝其應入列傳者尚有六  
子是書不載吳王誠韓王誠當是脫簡

乾隆四十九年校刊

舊五代史卷一百二十二

攷證



舊五代史卷一百二十二攷證

舊五代史卷一百二十二

宋門下侍郎參知政事監修國史薛居正等撰

周書第十四

列傳三

高行周字尚質幽州人也生于媯州懷戎軍之鵬窠里  
曾祖順厲世戍懷戎父思繼昆仲三人俱雄豪有武幹  
聲馳朔塞唐武皇之平幽州也表劉仁恭為帥仍留兵  
以戍之以思繼兄為先鋒都將媯州刺史思繼為中軍  
都將順州刺史思繼弟為後軍都將昆仲分掌燕兵部  
下士伍皆山北之豪也仁恭深憚之武皇將歸私謂仁



恭曰高先鋒兄弟勢傾州府爲燕患者必此族也宜善  
籌之久之太原戍軍恣橫思繼兄弟制之以法所殺者  
多太祖怒詬讓仁恭乃訴以高氏兄弟遂併遇害仁恭  
因以先鋒子行珪爲牙將諸子竝列帳下厚撫之以慰  
其心時行周十餘歲亦補職在仁恭左右行珪別有傳  
在唐書及莊宗收燕以行周隸明宗帳下常與唐末帝  
分率牙兵明宗征燕率其下擁從鄉人趙德鈞謂明宗  
曰行周心甚謹厚必享貴位梁將劉鄩之據莘也與太  
原軍對壘旦夕轉鬪常一日兩軍成列元行欽爲敵軍  
追躡劍中其面血戰未解行周以麾下精騎突陣解之

行欽獲免莊宗方寵行欽召行周撫諭賞勞而欲置之  
帳下又念于明宗帳下已奪行欽更取行周恐傷其意  
密令人以利祿誘之行周辭曰總管用人亦爲國家事  
總管猶事王也余家昆仲脫難再生承總管之厚恩忍  
背之乎及兩軍屯于河上覘知梁軍自汴入楊村寨明  
宗晨至斗門設伏將邀之衆寡不敵反爲所乘時予稍  
叢萃勢甚危賊行周聞之出騎橫擊梁軍遂得解去明  
宗之襲鄆州也行周爲前鋒會夜分澍雨人無進志行  
周曰此天贊也彼必無備是夜涉河入東城比曙平之  
莊宗平河南累加檢校太保領端州刺史同光末出守



絳州明宗卽位特深委遇天成中從王晏球圍定州敗  
王都擒托諾皆有功賊平遷潁州團練使長興初以北  
邊陷契丹用爲振武節度使明年以河西用軍移鎮延  
安清泰初改潞州節度使晉祖建義于太原唐末帝命  
張敬達征之行周與符彥卿爲左右排陣使契丹主入  
援太原也行周彥卿引騎拒之尋爲契丹所敗遂與敬  
達保晉安砦累月救軍不至楊光遠欲圖敬達行周知  
之引壯士護之敬達性慝不知其營護謂人曰行周每  
踵余後其意何也繇是不復敢然敬達遂爲光遠所害  
晉祖入洛令行周還藩加同平章事晉祖都汴以行周

爲西京畱守未幾移鄴都晉祖幸鄴會安從進叛命行  
周爲襄州行營都部署明年秋平定漢南晉少帝嗣位  
加兼侍中移鎮睢陽開運初從幸澶淵拒敵于河上車  
駕還京代景延廣爲侍衛親軍都指揮使移鄆州節度  
使時李彥韜爲侍衛都虞候可否在已行周雖典禁兵  
心遊事外退朝歸第門宇翛然賓友過從但引滿而已  
尋改歸德軍節度使以李守貞代掌兵柄許行周歸藩  
晉軍降于中渡也少帝命行周與符彥卿同守澶州契  
丹入汴召赴京師會草寇攻宋州急遣行周歸鎮宋史高懷  
德傳杜重威降契丹京東諸州羣盜大起懷德及契丹  
堅壁清野敵不能入行周率兵歸鎮敵遂解去



主死于樂城契丹將蕭翰立許王李從益知南朝軍國  
事遣死士召行周辭之以疾退謂人曰衰世難輔况兒  
戲乎漢高祖入汴加守太傅兼中書令代李守貞爲天  
平節度使杜重威據鄴叛漢祖以行周爲招討使總兵  
討之鄴平授鄴都留守加守太尉進爵臨清王乾祐中  
入覲加守太師進封鄴王復授天平節鉞改封齊王太  
祖踐阼加守尚書令增食邑至一萬七千戶太祖以行  
周耆年宿將賜詔不名但呼王位而已慕容彥超據兗  
叛太祖親征奉迎輿駕傾家載贄奉觴進俎率以身先  
太祖待之逾厚廣順二年秋以疾薨于位享年六十八

贈賻加等冊贈尚書令追封秦王諡曰武懿子懷德皇  
朝駙馬都尉宋州節度使

安審琦字國瑞其先沙陁部人也祖山盛朔州牢城都  
校贈太傅父金全安北都護振武軍節度使累贈太師  
唐書有傳審琦性驍果善騎射幼以良家子事莊宗爲  
義直軍使遷本軍指揮使天成初唐末帝由潞邸出鎮  
河中奏審琦爲牙兵都校未幾入爲歸化指揮使王師  
伐蜀充行營馬軍都指揮使及凱旋改龍武右廂都校  
領富州刺史清泰初爲捧聖指揮使領順化軍節度使  
其年鎮邢州兼北面行營排軍陣使從張敬達圍太原



及楊光遠舉晉安寨降于晉祖審琦亦預焉晉祖踐阼加檢校太傅同平章事充天平軍節度使兼侍衛馬步軍都指揮使旋以母喪起復天福三年就加檢校太尉尋改晉昌軍節度使京兆尹七年移鎮河中晉少帝嗣位加檢校太師開運末朝廷以契丹入寇以審琦爲北面行營馬軍左右廂都指揮使與諸將會兵于洛州俄而敵騎大至時皇甫遇慕容彥超亦預其行乃率所部兵與敵戰于安陽河上時遇馬爲流矢所中勢已危蹙諸將相顧莫有敢救者審琦謂首將張從恩曰皇甫遇等未至必爲敵騎所圍若不急救則爲擒矣從恩曰敵

勢甚盛無以枝梧將軍獨往何益審琦曰成敗命也若不濟與之俱死假令失此二將何面目以見天子遂率鐵騎北渡敵見塵起謂救兵至乃引去遂救遇與彥超而還晉少帝嘉之加兼侍中移領許州未幾移鎮兗海漢有天下授襄州節度使兼中書令屬荆人判命潛遣舟師數千屠襄郢審琦禦之而遁朝廷賞功就加守太保進封齊國公歲餘又加守太傅國初封南陽王顯德初進封陳王世宗嗣位加守太尉三年拜章請覲優詔許之加守太師增食邑至一萬五百戶食實封二千三百戶審琦鎮襄沔僅一紀嚴而不殘威而不暴故南邦



之民甚懷其惠五年移平盧軍節度使承詔赴鎮因朝于京師世宗以國之元老禮遇甚厚車駕親幸其第以寵之六年正月七日夜爲其隸人安友進安萬合所害時年六十二初友進與審琦之愛妾私通有年數矣其妾常慮事泄見誅因與友進謀害審琦友進甚有難色其妾曰爾若不從我當反告友進乃許之至是夕審琦沈醉寢于帳中其妾乃取審琦所枕劍與友進友進猶惶駭不敢刺刃遽召其黨安萬合便殺審琦既而慮事泄乃引其帳下數妓盡殺以滅其跡不數日友進等竟敗悉爲子守忠齮而戮之世宗聞之震悼輟視朝三日

詔贈尙書令追封齊王守忠仕皇朝累爲郡守

安審暉字明遠審琦之兄也起家自長直軍使轉外衙左廂軍使從莊宗平幽薊戰山東定河南皆預其功同光中授蔚州刺史天成初改汝州防禦副使歷鳳翔徐州節度副使河東行軍司馬晉高祖龍飛以霸府上僚授振武兵馬畱後遷河陽節度使不踰月移鎮鄜州丁內艱起復視事五年李金全據安州叛詔馬全節爲都部署領兵討之以審暉爲副安陸平移鎮鄧州進位檢校太傅六年冬襄州安從進叛舉漢南之衆北攻南陽南陽素無城壁唯守衙城賊傳城下審暉登陴召賊帥



以讓之從進不克而退襄州平就加檢校太尉少帝嗣位加檢校太師罷鎮授右羽林統軍歲餘出鎮上黨屬契丹內侵授邢州節度使居無何目疾暴作上章求代歸于京師養疾累年太祖卽位召于內殿從容顧問尤所歎重將以祿起之審暉辭以暮齒願就願養拜太子太師致仕封魯國公累食邑五千戶實封四百戶廣順二年春卒年六十三廢朝二日詔贈侍中諡曰靜子守鱗仕皇朝爲贊善大夫

安審信字行光審琦之從父兄也父金祐世爲沙陁部偏裨名聞邊塞審信習騎射從父金全天成初爲振武

節度使補爲牙將俄而兄審通爲滄州節度使用爲衙內都虞候歷同陝許三州馬步軍都指揮使晉祖起義于太原唐末帝命張敬達以兵攻之而審信率先以部下兵遁入并州晉祖以其故人得之甚悅其妻與二子在京師皆爲唐末帝所戮但貸其老母而已契丹旣降晉安砮晉高祖以審信爲汾州刺史檢校太保充馬步軍副部署晉祖入洛授河州節度使檢校太尉同平章事審信性旣翻覆率多疑忌在蒲中時每王人告諭騎從稍多必潛設備以防其圖已尋歷許兗州鎮所至以聚斂爲務民甚苦之會朝廷謀大舉北伐凡藩侯皆預



將帥以審信爲馬步軍右廂都排陣使俄改華州節度使漢初移鎮同州入爲左衛上將軍國初轉右金吾上將軍三年夏四月太祖御乾元殿入閣審信不赴班位爲御史所彈詔釋之時審信久病神情恍惚聞臺司奏劾揚言曰趨朝偶晚未是大過何用彈舉我終進奉二萬緡盡逐此乞索兒輩未幾以病請退授太子太師致仕是歲秋卒年六十贈侍中諡曰成穆

李從敏字叔達唐明宗之猶子也沈厚寡言善騎射多計數初莊宗召見試弓馬用爲衙內馬軍指揮使從平汴洛補帳前都指揮使遷捧聖都將明宗移鎮真定表

爲成德軍馬步軍都指揮使從明宗入洛補皇城使出爲陝府節度使王都據定州叛命王晏球爲招討使率師討之以從敏爲副領滄州節度使王都平移授定州尋代范延光爲成德軍節度使加檢校太尉封涇王鎮州有市人劉方遇家富于財方遇卒無子妻弟田令遵者幼爲方遇治財善殖貨劉族乃共推令遵爲方遇子親族共立券書以爲誓信累年後方遇二女取資于令遵不如意乃訟令遵冒姓奪父家財從敏令判官陸浣

鞠其獄而殺令遵

北夢瑣言云鎮州市人劉方遇家財數十萬方遇妻田氏蚤卒田之妹爲

尼常出入方遇家方遇使尼長髮爲繼室有田令遵者方遇之妻弟也善貨殖方遇以所積財令遵興殖焉



方遇有子年幼二女皆嫁方遇疾卒子幼不能督家業  
方遇妻及二女以家財素爲令遵與殖乃聚族合謀請  
以令遵姓劉爲方遇繼嗣卽令鬻券人安美爲親族請  
嗣券書既定乃遣令遵服斬衰居喪而二女初立令遵  
時先邀每月供財二萬及後求取無厭而石李二女夫  
使二女詣本府論訴云令遵冒姓奪父家財令遵下獄  
石李二夫族與本府要吏親黨上至府帥判官行軍司  
馬隨使都押衙各受方遇二女賂錢數千緡而以令遵  
與姊及書券安美同情令遵父詣臺訴冤詔本州節度  
共盜俱棄市人知其冤  
副使符蒙掌書記徐台符鞫之備明姦狀及詰二女伏  
行賂于節度使趙環代判高知柔觀察判官陸浣竝捕  
下獄具服贓罪事連從敏甚懼乃命其妻赴洛陽入宮  
告王淑妃明宗知之怒曰朕用從敏爲節度使而枉法  
殺人我羞見百官又令新婦奔赴不須見吾面時王淑

妃頗庇護之趙環等三人竟棄市從敏等止于罰俸而

已北夢瑣言從敏初欲削官長興初移鎮宋州唐末帝

中宮哀祈竟罰一年俸

起兵于鳳翔其子重吉爲亳州防禦使從敏承朝廷命

害之清泰中從敏與洋王從璋竝罷歸第待之甚薄嘗

宮中同飲既醉末帝謂從璋從敏曰爾等何物處雄藩

大鎮二人大懼賴曹太后見之叱曰官家醉爾輩速出

去方得解晉祖革命降封莒國公再領陝州尋移鎮上

黨入爲右龍武統軍出爲河陽節度使漢祖入汴移授

西京畱守累官檢校太師同平章事隱帝卽位就加兼

侍中改封秦國公歲餘以王守恩代還廣順元年春以



疾卒年五十四詔贈中書令諡曰恭惠

鄭仁誨字日新晉陽人父霸累贈太子太師仁誨幼事唐驍將陳紹光恃勇使酒嘗乘醉抽佩劔將刺刃于仁誨左右無不奔避唯仁誨端立以俟略無懼色紹光因擲劔于地謂仁誨曰汝有此器度必當享人間富貴及紹光典郡仁誨累爲右職後退歸鄉里以色養爲樂漢高祖之鎮河東也太祖累就其第與之燕語每有質問無不以正理爲答太祖深器之漢有天下太祖初領樞務卽召爲從職及太祖西征嘗密贊軍機西師凱旋累遷至檢校吏部尚書太祖踐阼旌佐命功授檢校司空

客省使兼大內都點檢恩州團練使尋爲樞密副使踰年轉宣徽北院使右衛大將軍出鎮澶淵轉檢校太保入爲樞密使加同平章事世宗之北征也以仁誨爲東京留守調發軍須供億無闕車駕迴加兼侍中尋丁內艱未幾起復顯德二年冬疾亟世宗幸其第親加撫問歛歛久之及卒世宗親臨其喪哭踰數舉是時世宗將行近臣奏云歲道非便不宜臨喪弗聽然而先之以桃芻之事時以爲得禮仁誨爲人端厚謙損造次必由于禮及居樞務雖權位崇重而能孜孜接物無自矜之色及終故朝廷咸惜之詔贈中書令追封韓國公諡曰忠



正既葬命翰林學士陶穀撰神道碑文官爲建立表特  
恩也子勳累歷內職蚤卒絕嗣初廣順末王殷受詔赴  
闕太祖遣仁誨赴鄴都巡檢及殷得罪仁誨不奉詔卽  
殺其子蓋利其家財妓樂也及仁誨卒而無後人以爲  
陰責焉

張彥成潞州潞城人也曾祖靜汾州刺史祖述澤州刺  
史父礪昭義行軍司馬彥成初爲并門牙將天成中自  
秦州鹽鐵務官改鄆州都押牙漢祖鎮北門表爲行軍  
司馬以隱帝娶其女特見親愛從平汴洛累加特進檢  
校太尉同州節度使隱帝卽位就加同平章事太祖之

伐河中彥成有饋輓之勞河中平加檢校太師乾祐三  
年冬移鎮相州廣順初就加兼侍中尋移鎮南陽三年  
秋代歸授右金吾衛上將軍其年秋以疾卒年六十贈  
侍中宋史楊克讓傳乾祐中同州節度張彥成表授掌  
書記周廣順初彥成移鎮安陽穰下克讓以舊職  
從行彥成入爲執金吾病篤奏稱其材可用克讓以彥  
成死未葬不忍就祿退居別墅俟張氏子外除時論稱  
之

安叔干沙陀三部落之種也父懷盛事唐武皇以驍勇  
聞叔干習騎射從莊宗定河南爲奉安部將天成初王  
師伐定州命爲先鋒都指揮使王都平授秦州刺史連  
判涿易二郡清泰初契丹寇鴈門叔干從晉祖迎戰敗



之進位檢校太保振武節度使晉祖踐阼就加同平章  
事天福中歷邠滄邢晉四鎮節度使叔千鄙野而無文  
當時謂之安没字言若碑碣之無篆籀但虛有其表耳  
開運初朝廷將大舉北伐授行營都排陣使俄改左金  
吾衛上將軍契丹入汴百僚迎見于赤岡契丹主登高  
岡駐馬而撫諭漢官叔千出班獨立契丹主曰爾是安  
没字否卿比在邢州日遠輸誠欵我至此汝管取一喫  
飯處叔千拜謝而退俄授鎮國軍節度使漢初遇代歸  
京自以嘗附幕庭居常愧惕久之授太子太師致仕尋  
請告歸洛廣順二年冬卒年七十二詔贈侍中

宋彥筠雍邱人也初隸滑州軍梁氏與莊宗夾河之戰  
彥筠時爲戰棹都指揮使以勞遷開封府牙校莊宗有  
天下擢領禁軍伐蜀之役率所部從康延孝爲前鋒蜀  
平歷維渝二州刺史明宗在位連典數郡晉初自汝州  
防禦使討安從進于襄陽以功拜鄧州節度使累官至  
檢校太尉未幾歷晉陝二鎮晉少帝嗣位再領鄧州尋  
移鎮河中漢初授太子太師致仕國初拜左衛上將軍  
世宗嗣位復爲太子太師致仕顯德四年冬卒于西京  
之私第輟視朝一日詔贈侍中初彥筠入成都據一甲  
第第中資貨鉅萬妓女數十輩盡爲其所有一旦與其



主母微忿遽擊殺之自後常有所睹彥筠心不自安乃  
修浮屠法以禳之因而溺志于釋氏其後每歲至金仙  
入涅之日常衣斬縗號慟于其像前其佞佛也如是家  
有侍婢數十人皆令削髮披緇以侍左右大爲嘗時所  
誚又性好貨殖能圖什一之利良田甲第相望于郡國  
將終以伊洛之間田莊十數區上進竝籍于官焉

史臣曰近代領戎藩列王爵祿厚而君子不議望重而  
人主不疑能自晦于飲酌之間保功名于始終之際如  
行周之比者幾何人哉奕世藩翰固亦宜然審琦有分  
闔之勞乏御家之道峰摧玉折蓋不幸也其餘雖擁戎  
旄未聞闔政固不足與文名龔黃爲比也



舊五代史卷一百二十三

舊五代史卷一百二十三攷證

周列傳二高行周傳。行周通鑑攷異引莊宗實錄作行溫是書唐紀尚仍實錄之舊

鄭仁誨傳太祖踐阼旌佐命功授檢校司空客省使。

案歐陽史云漢興周太 為樞密使乃召仁誨用之

累官至內客省使太祖入立以仁誨為大內都巡檢

據此傳仁誨仕周始為客省使與歐陽史異

張彥成傳。案通鑑攷異彥成本名彥威避周祖諱故

改

托諾舊作禿餒今改



舊五代史卷一百二十三攷證

舊五代史卷一百二十四

乾寧三年閏八月

宋門下侍郎參知政事監修國史薛居正等撰

周書第十五

列傳四

王殷瀛州人曾祖昌裔本州別駕祖光滄州教練使因家焉唐末幽滄大亂殷父咸珪避地南遷因投于魏軍殷自言生于魏州之開元寺既長從軍漸為偏將唐同光末為華州馬步軍副使因家于華下天成中移授靈武都指揮使久之代還清泰中張令昭據鄴叛殷從范延光討之首冒矢石率先登城以功授邠州刺史尋改

乾隆四十九年校刊

舊五代史卷一百二十四

列傳

一



原州殷性謙謹好禮事母以孝聞每與人結交違從皆先稟于母母命不從殷必不往雖在軍旅交遊不雜及爲刺史政事小有不佳母察之立殷于庭詰責而杖之歐陽史殷爲刺史政事有小失母責之殷卽取杖授婢僕自笞于母前晉天福中丁內艱尋有詔起復授憲州刺史殷上章辭曰臣爲末將出處無損益于國家臣本燕人值鄉國離亂少罹偏罰因母鞠養訓導方得成人不忍遽釋苴麻遠離廬墓伏願許臣終母喪紀晉高祖嘉而許之晉少帝嗣位會殷服闋召典禁軍累遷奉國右廂都指揮使漢祖受命從討杜重威于鄴下殷與劉詞皆率先力戰矢中于首久之出

折鏃于口中以是漢祖嘉之乾祐末遷侍衛步軍都指揮使領夔州節度使會契丹寇邊遣殷領兵屯澶州及李業等作亂漢隱帝密詔澶帥李洪義遣圖殷洪義懼不克反以變告殷殷與洪義同遣人至鄴請太祖赴內難殷從平京師授侍衛親軍都指揮使太祖卽位授天雄軍節度使加同平章事典軍如故殷赴鎮以侍衛司局從凡河北征鎮有戎兵處咸稟殷節制又于民間多方聚斂太祖聞而惡之因使宣諭曰朕離鄴時帑廩所儲不少卿與國家同體隨要取給何患無財三年夏太祖征兗還殷迎謁于路宴賜而去及王峻得罪太祖遣



其子飛龍使承誨往謁令口諭峻之過惡以慰其心三年秋以永壽節上表請覲太祖雖允其請且慮殷之不誠尋遣使止之何福進在鎮州素惡殷之太橫福進入朝撫其陰事以奏之太祖遂疑之是年冬以郊禋有日殷自鎮入覲太祖令依舊內外巡警殷出入部從不下數百人又以儀形魁偉觀者無不聳然一日遽入奏曰郊禮在近兵民大集臣城外防警請量給甲仗以備非常太祖難之時中外以太祖嬰疾步履稍難多不視朝俯逼郊禋殷有震主之勢頗憂之太祖乃力疾坐于滋德殿殷入起居卽命執之尋降制流竄及出都城遽殺

之衆情乃安是歲春末鄴城寺寺鐘懸絕而落又火光出幡竿之上殷之入覲也都人餞于離亭上馬失鐙翻墮于地人訝其不祥果及于禍太祖尋令漣帥鄭仁誨赴鄴殷次子爲衙內指揮使不候謁仁誨誅之遷其家屬于登州

何福進字善長太原人父神劔累贈左驍衛大將軍福進少從軍以驍勇聞唐同光末郭從謙以兵圍莊宗于大內福進時爲宿衛軍校獨出死力拒戰于內後明宗知而嘉之擢爲奉聖軍校出爲磁州刺史充北面行營先鋒都校清泰中自彰聖都虞候率本軍從范延光平



鄴以功歷鄭隴二州防禦使開運中由潁州團練使入拜左驍衛大將軍屬契丹陷中原令中朝文武臣寮凡數十人隨帳北歸時福進預其行行次鎮州聞北主已斃其黨尚據鎮陽遂與李筠白再榮之儔合謀力戰盡逐契丹據有鎮陽時漢祖已建號于河東詔以福進爲北面行營馬步都虞候尋拜曹州防禦使檢校太保太祖出鎮于鄴將謀北伐奏以福進自隨及太祖入平內難以輔佐功拜忠武軍節度使不數月移領鎮州數年之間北鄙無事及聞太祖將有事于南郊拜章入覲改天平軍節度使加同平章事未及之任卒于東京之私

第年六十有六時顯德元年正月也累贈中書令子繼筠仕皇朝領建武軍節度使卒

劉訶字好謙元城人梁貞明中事故鄴帥楊師厚以勇悍聞唐莊宗入魏亦列于麾下兩河之戰無不預焉同光初爲効節軍使轉劔直指揮使尋以忤于權臣出爲汝州小校凡留滯十餘年清泰初詔諸道選驍果以實禁衛由是得入典禁軍晉初從侯益收汜水關佐楊光遠平鄴都累遷奉國第一軍都虞候後從馬全節伐安陸敗淮賊萬餘衆晉祖嘉之授奉國都校累加檢校司空又從杜重威敗安重榮于宗城及圍鎮陽訶自登雲



梯身先士伍以功加檢校司徒沁州刺史時王師方討襄陽尋命詞兼行營都虞候襄陽平遷本州團練使在郡歲餘臨事之暇必被甲枕戈而卧人或問之詞曰我以勇敢而登貴仕不可一日而忘本也若信其溫飽則筋力有怠將來何以報國也及漢有天下復爲奉國右廂都校遙領閩州防禦使從太祖平鄴加檢校太保乾祐初李守貞叛于河中太祖征之朝廷以爲侍衛步軍都指揮使遙領寧江軍節度使充行營馬步都虞候命分屯于河西二年正月守貞遣敢死之士數千夜入其營皆怖懼不知所爲惟詞神氣自若令于軍中曰此小

盜耳不足驚也遂免胄橫戈叱短兵以擊之賊衆大敗而退自是守貞喪膽不復有奔突之意河中平太祖嘉之表其功爲華州節度使歲餘移鎮邢臺太祖受命加同平章事三年秋改鎮河陽顯德初世宗親征劉崇詞奉命領所部兵隨駕行及高平南遇樊愛能等自北退迴且言官軍已敗止詞不行詞不聽疾驅而北世宗聞而嘉之尋命爲隨駕都部署又授河東道行營副部署其年夏車駕還京授永興軍節度使加兼侍中行京兆尹二年冬以疾卒于鎮年六十有五贈中書令諡曰忠惠詞發身軍校亟歷戎事常以忠勇自負洎領藩鎮能



靖恭爲治無苛政以撓民謚以忠惠議者避之子延欽  
仕皇朝爲控鶴廂使

王進幽州良鄉人少落魄不事生業爲人勇悍走及奔  
馬嘗聚黨爲盜封境患之符彥超爲河朔郡守以賂誘  
置之左右長興初彥超鎮安州屬部曲王希全構亂軍  
州令進齎變狀聞于朝廷明宗賞其捷足詔隸于軍中  
洎契丹內寇戰于膠口進獨追擒六十七人時漢祖總  
侍衛親軍知其驍果擢爲馬前親校漢祖鎮河東或邊  
上警急令進齎封章達于闕下自并至汴不六七日復  
焉由是恩撫頗厚繼任戎職累遷至奉國軍都指揮使

從太祖入平內難以功遷虎捷右廂都指揮使歷汝鄭  
防禦使亦有政聲俄授相州節度使爲政之道頓減于  
前議者惜之顯德元年秋以疾卒于任贈檢校太師  
史彥超雲州人也性驍獷有膽氣累功至龍捷都指揮  
使太祖之赴內難彥超以本軍從國初與虎捷都指揮  
使何徽戍晉州會劉崇與契丹入寇攻圍州城月餘是  
時本州無帥知州王萬敢不協物情彥超與何徽協力  
固拒累挫敵鋒攻擊日急禦捍有備軍政甚嚴居人無  
擾及朝廷遣樞密使王峻總兵爲援敵兵宵遁太祖嘉  
其善守之功賞賜甚厚未幾授龍捷右廂都指揮使尋



授鄭州防禦使劉崇之寇潞州也車駕親征以彥超為先鋒都指揮使高平之戰先登陷陣以功授華州節度使先鋒如故大軍至河東城下契丹營于忻代之間遙應賊勢詔天雄軍節度使符彥卿率諸將屯忻州以拒之彥卿襲契丹于忻口彥超以先鋒軍追蕃兵離大軍稍遠賊兵伏發為賊所陷世宗痛惜久之詔贈太師示加等也仍命優卹其家焉

史懿字繼美代郡人也本名犯太祖廟諱故改焉父建瑋事唐莊宗為先鋒都校唐書有傳莊宗之伐鎮陽時建瑋為流矢所中而卒懿時年甫弱冠莊宗以其父歿

于王事召拜昭德軍使俄遷先鋒左右廂都校俾嗣其家聲天成中為涿州刺史晉初由趙州刺史遷洛州團練使尋歷亳鳳二州防禦使晉祖以其弟翰尚晉國長公主故尤所注意天福中授彰武軍節度觀察畱後開運初歷澶貝二鎮節度使三年移鎮涇原未幾契丹入中原時四方征鎮為契丹所召者靡不磨至惟懿堅壁拒命仍送款于漢祖漢有天下就拜檢校太尉同平章事及賜功臣名號廣順初加檢校太師兼侍中進封邠

國公顯德元年春以抱病歸朝東都事略楊廷璋傳周太祖常諭廷璋圖涇帥

史懿廷璋屏左右示以詔途經洛卒于其第年六十三

書懿受代入朝遂免禍

乾隆四十九年校刊

書史懿卷一百四

列傳



贈中書令

王令溫字順之瀛州河間人也父迪德州刺史累贈太子太師令溫少以武勇稱初隸唐莊宗麾下稍遷廳直軍校明宗之爲統帥嘗與契丹戰于上谷明宗臨陣馬逸爲敵所迫令溫乃以所乘馬授明宗而自力戰飛矢連發敵兵爲之稍卻及明宗卽位歷遷神武彰聖都校晉初自淄州刺史遷洛州團練使及安重榮稱兵于鎮州晉祖以令溫爲行營馬軍都指揮使與都帥杜重威敗賊于宗城以功授亳州防禦使尋拜永清軍節度使屬契丹來寇時令溫奉詔入朝契丹遂陷貝州其家屬

因没于契丹晉少帝憫之授武勝軍節度使未幾移鎮延州又遷靈武漢有天下復爲永清軍節度使尋改安州國初加檢校太尉同平章事世宗嗣位遷鎮安軍節度使罷鎮歸闕顯德三年夏以疾卒時年六十有二詔贈侍中

周密字德峯應州神武川人也初事後唐武皇爲軍職莊宗之平常山明宗之襲汝陽密皆從征有功莊宗平梁授鎮州馬軍都指揮使明宗卽位累遷河東馬步軍副都指揮使晉天福初除冀州刺史累官至檢校司徒入爲右羽林統軍檢校太保四年秋授保大軍節度使



檢校太傅屬部民作亂密討平之尋移鎮晉州加檢校太尉開運中入拜右龍武統軍三年秋出鎮延州其年冬契丹陷中原延州軍亂立高允權爲帥時密據東城允權據西城相拒久之會漢高祖建義于太原遣使安撫密乃棄其城奔于太原隨漢祖歸汴久居于闕下廣順初授太子太師致仕顯德元年春卒時年七十五長子銳仕皇朝爲內職次子廣歷諸衛大將軍

李懷忠字光孝太原晉陽人父海本府軍校懷忠形質魁壯初事唐莊宗隸于保衛軍夾城之役懷忠率先登城以功補本軍副兵馬使莊宗平定山東累遷保衛軍

使天成中歷陝府許州滄州都指揮使遙領辰州刺史清泰初以河西蕃部寇鈔命懷忠屯方渠晉祖受命以懷忠故人召典禁兵三遷護聖左右廂都指揮使遙領壽州節度使檢校太保未幾爲同州節度使檢校太傅少帝嗣位入爲右羽林統軍改左武衛上將軍廣順中以太子太傅致仕三年夏卒年六十六詔贈太子太師白文珂字德温太原人也曾祖辯父君成遼州刺史文珂初事後唐武皇補河東牙將改遼州副使莊宗嗣位轉振武都指揮使天成中鎮州節度使王建立表爲本州馬步軍都指揮使遙授舒州刺史檢校司空歷青州



魏府都指揮使歷瀛蔚忻代四州刺史領代州日兼蕃漢馬步都部署漢高祖鎮并門表爲副留守檢校太保漢國初建授河中節度使西南面招討使檢校太傅漢祖定兩京改天平軍節度使加同平章事未幾鎮陝州檢校太師會河中李守貞叛詔充河中府行營都部署時文珂已老朝議恐非守貞之敵乃命太祖西征河中平文珂授西京留守河南尹太祖踐阼加兼中書令頃之以太子太師致仕世宗卽位封晉國公顯德元年卒于西京年七十九輟視朝一日子廷誨仕皇朝歷諸衛將軍卒

白延遇字希望太原人也幼畜于晉之公宮年十三從晉祖伐蜀以趨悍見稱晉有天下歷典禁軍累遷至檢校司空天福中晉祖在鄴安重榮叛于鎮州帥衆數萬詣闕而來晉祖命杜重威統諸將以禦之時延遇不預其行乃泣告晉祖願以身先許之及陣于宗城延遇率其屬先犯之斬級數十戰旣酣而劔亦折諸將由是推伏晉祖聞之卽命中使以寶劔良馬賜之常山平以功授檢校司徒充馬軍左廂都校後出爲汾州刺史遷復州防禦使國初加檢校太保尋受代歸闕屬太祖親征兗海以延遇爲先鋒都校兗州平授齊州防禦使歲餘



改兗州防禦使在兗二年爲政有聞人甚安之州民數百詣闕乞立德政碑以頌其美顯德二年冬世宗命宰臣李穀爲淮南道軍都部署乃詔延遇爲先鋒都校三年春帥其所部與韓令坤先入揚州軍聲甚振尋命以別部屯于盛唐前後敗淮賊萬餘衆四年夏世宗迴自壽春制以延遇爲同州節度使未赴任復命帥衆南征是年冬以疾卒于濠州城下詔贈太尉

唐景思秦州人也幼以屠狗爲業善角觝戲初事僞蜀爲軍校唐同光中莊宗命魏王繼岌帥師伐蜀時景思以所部戍于固鎮首以其城降于繼岌乃授興州刺史

爲貝州行軍司馬屬契丹攻其城因陷于幕庭趙延壽素知其名令隸于帳下署爲所部壕砦使開運末契丹據中原以景思爲亳州防禦使領事之日會草寇數萬攻圍其城景思悉力以拒之後數日城陷景思挺身而出使人告于隣郡得援軍數百逐其草寇復有其城亳民賴是以濟漢初改授鄧州行軍司馬常鬱鬱不得志後受代歸闕乾祐中命景思爲沿淮巡檢使屢挫淮賊時史宏肇淫刑黷貨多織羅南北富商殺之奪其財大開告密之門景思部下有僕夫希求無厭雖委曲待之不滿其心一日拂衣而去見宏肇言景思受淮南厚賂



私貯器械欲爲內應宏肇卽令親吏率三十騎往收之告者謂收吏曰景思多力十夫之敵也見便殺之不然則無及矣收騎至景思迎接有欲擒之者景思以兩手抱之大呼曰寃哉景思何罪設若有罪死亦非晚何不容披雪公等皆丈夫安忍如此都將命釋之引告者面證景思言受淮南賂景思曰我從人家人並在此若有十緡貯積亦是受賂言我貯甲仗除官賜外有一事亦是私貯使者搜索其家惟衣一笥軍籍糧簿而已乃寃之景思曰使但械繫送我入京先是景思別有紀綱王知權者在京聞景思被誣乃見史宏肇曰唐景思赤心

爲國某服事三十年孝于父母義于朋友被此誣罔何以伸陳某請先下獄願公追劾景思免至寃橫宏肇愍之令在獄日與酒食景思旣桎梏就路賴毫之人隨至京師衆保證之宏肇乃令鞠告事者具伏誣陷卽斬之遂奏釋景思顯德初河東劉崇帥衆來寇世宗親總六師以禦之及陣于高平景思于世宗馬前距踴數四且曰願賜臣堅甲一聯以觀臣之効用世宗由是知其名因以高平陣所得降軍數千人署爲効順指揮命景思董之使于淮上三年春世宗親征淮甸景思繼有戰功乃命遙領饒州刺史未幾改授濠州行刺史令帥衆攻



圍濠州四年冬、因力戰為賊鋒所傷數日而卒世宗甚憫之詔贈武清軍節度使

史臣曰自古為人臣者望重則必危功崇則難保自非賢者疇能免之況王鄴帥昧明哲之規周太祖乃雄猜之主欲無及禍其可得乎自福進而下皆將帥之英也擁旌作翰諒亦宜然惟彥超以捍寇而沒可不謂忠乎

舊五代史卷一百二十四

舊五代史卷一百二十四攷證

周列傳四王殷傳瀛州人 案歐陽史作大名人

劉詞傳轉劍直指揮使 案歐陽史作長劍指揮使

贈中書令 案歐陽史作贈侍中據是書則詞以兼侍中贈中書令非贈侍中也疑歐陽史誤

史彥超傳與虎捷都指揮使何徵戍晉州 案歐陽史作彥超遷虎捷都指揮使與是書異

史懿傳本名犯太祖廟諱故改焉 案本名二句疑為後人竄入攷懿名匡懿避宋太祖御名故去匡字薛史成于開寶六年不應豫稱為太祖或係宋人讀是



書者附注于後遂混入正文也

舊五代史卷一百二十四攷證

舊五代史卷一百二十五

宋門下侍郎參知政事監修國史薛居正等撰

周書第十六

列傳五

趙暉字重光澶州人也弱冠以驍果應募始隸于莊宗  
帳前與大梁兵經百餘戰以功遷馬直軍使同光中從  
魏王破蜀命暉分統所部南戍蠻陬明宗卽位徵還授  
禁軍指揮使晉有天下參掌衛兵從馬全節圍安陸佐  
杜重威戰宗城皆有功改奉國指揮使開運末以部兵  
屯于陝屬契丹入汴慨然有憤激之意及聞漢祖建義



于并門乃與部將王晏侯章戮力叶謀逐契丹所命官

屬據有陝州卽時馳騎聞于漢祖

通鑑契丹主賜趙暉詔卽以爲保義留後

暉斬契丹使者焚其詔遣支使河間趙矩奉表晉陽

漢祖乃命暉爲保義軍節度

陝虢等州觀察處置等使漢祖之幸東京路出于陝暉

戎服朝于路左手控六飛達于行宮君臣之義如舊結

焉旋加檢校太尉乾祐初移鎮鳳翔加同平章事屬王

景崇叛據岐山及期不受代朝廷卽命暉爲西南面行

營都部署統兵以討之時李守貞叛于蒲趙思綰據于

雍與景崇皆遞相爲援又引蜀軍出自大散關勢不可

遏暉領兵數千數戰而勝然後塹而圍之暉屢使人挑

戰賊終不出乃潛使千餘人于南城一舍之外環甲執

兵僞爲蜀兵旗幟循南山而下詐令諸軍聲言川軍至

矣須臾西南塵起城中以爲信乃令數千人潰圍而出

以爲應援暉設伏而待一鼓而盡殪之自是景崇膽破

不復敢出明年春拔之加檢校太保兼侍中國初就加

兼中書令三年春年章請覲詔從之入朝授歸德軍節

度使顯德元年受代歸闕以疾告老授太子太師致仕

進封秦國公尋卒于其第年六十七制贈尚書令

王守恩字保信太原人父建立潞州節度使封韓王晉

書有傳守恩以門蔭幼爲內職遷懷衛二州刺史後歷



諸衛將軍開運末契丹陷中原守恩時因假告歸于潞  
 時潞州節度使張從恩懼契丹之盛將朝于契丹以守  
 恩婚家甚倚信之乃移牒守恩請權為巡檢使從恩既  
 去守恩以潞城歸于漢祖仍盡取從恩之家財通鑑云  
 副使趙行遷知留後牒守恩權巡檢使與高防佐之高  
 防與守恩謀遣指揮使李萬超白晝率眾大譟斬趙行  
 遷推守恩權知昭義留後守恩殺契丹使者舉鎮來降  
 宋史李萬超傳云張從恩將棄城歸契丹會前驍衛將  
 軍王守恩服喪私第從恩即委以後事遁去及契丹使  
 至專領郡務守恩遂無所預萬超奮然謂其部下曰我  
 輩垂餌虎口苟延旦夕之命今欲殺使保其城非止逃  
 生亦足建勲業汝曹能乎眾皆躍然喜曰敢不唯命遂  
 率所部大譟入府署殺其使推守恩為帥列狀以聞漢  
 祖從其請乃命史宏肇統兵先渡河至潞見萬超語之  
 口收復此州公之力也吾欲殺守恩以公為帥可乎萬  
 超對曰殺契丹使以推守恩蓋為社稷計耳今若賊害

于人自取其利非宿心也宏肇大奇之漢祖即以守恩為昭義軍節度使

漢有天下移鎮邠寧加同平章事乾祐初遷永興軍節  
 度使時趙思綰已據長安乃改授西京留守守恩性貪  
 鄙委任羣小以掎斂為務雖病廢殘癯者亦不免其稅  
 率人甚苦之洛都嘗有豪士為二姓之會守恩乃與伶  
 人數輩夜造自為賀客因獲百數笏而退太祖迴自河  
 中駐軍于洛陽詔以白文珂代之守恩甚懼而洛人有  
 曾為守恩非理割剝者皆就其第徵其舊物守恩一一  
 償之及赴闕止奉朝請而已乾祐末既殺史宏肇等漢  
 少帝召羣臣上殿以諭之時守恩越班而颺言曰陛下



今日始睡覺矣其出言鄙俚如此國初授左衛上將軍

顯德初改右金吾衛上將軍封許國公二年冬昇疾歸

洛而卒五代史補周高祖為樞密鳳翔永興河中三鎮

為留守以反高祖帶職出討之迴戈路由洛陽時王守恩

大怒且疾驅入于公館久之始令人傳旨托以方浴守

恩不知其怒但安坐俟久時白文珂在高祖麾下召而

謂曰王守恩乘檐子俟吾誠無禮也安可久為留守汝

宜急去代之文珂不敢違于是即時禮上項之吏馳去

報守恩曰白侍中受樞密命為留守訖守恩大驚奔馬

而歸但見家屬數百口皆被逐于通衢中百姓莫不聚

觀其亦有乘便號叫索取貨錢物者高祖使吏籍其數

立命償之家財為之一空朝廷悚然不甚為理

孔知濬字秀川徐州滕縣人故太子太師致仕勅之猶

子也父延緘左武衛大將軍致仕年九十餘卒知濬仕

梁為天興軍使同光末勅鎮昭義時莊宗用唐朝故事

以黃門為監軍皆恃恩暴橫節將不能制明宗鄴城之

變諸鎮多殺監軍時監潞者懼誅欲誘鎮兵謀變知濬

伏甲于室凌晨監軍來謁執而殺之軍城遂寧明宗嘉

之洎勅罷鎮以知濬為澤州刺史入為左驍衛大將軍

長興清泰中歷唐復成三郡刺史晉高祖即位用為奉

國右廂都指揮使領舒州刺史從征范延光于鄴遷宿

州團練使俄改隴州防禦使開運中移刺鳳州累官至

檢校太傅河池據關防之要密邇邛蜀兵少勢孤知濬

撫士得宜人皆盡力故西疆無牧圉之失契丹主稱制

乾隆四十九年校刊

書卷之三十三

四



署滑州節度使漢祖受命自鎮入朝隱帝嗣位授密州防禦使踰歲以疾受代歸朝廣順三年冬卒于京師王繼宏冀州南宮人少嘗爲盜攻剽間里爲吏所拘械繫于鎮州獄會赦免死配隸本軍時明宗作鎮致之麾下晉高祖爲明宗將署爲帳中小校天福中爲六軍副使性負氣不遜禁中與同列忿爭出配義州軍歲餘爲奉國指揮使從契丹主至相州遂令以本軍戍守契丹主留高唐英爲相州節度使唐英善待繼宏每候其第則升堂拜繼宏之母贈遺甚厚倚若親戚又給以兵仗畧無猜忌會契丹主死漢祖趨洛唐英遣使歸款漢祖

大悅將厚待唐英使未迴繼宏與指揮使樊暉等共殺唐英繼宏自稱留後令判官張易奉表于漢祖人或責以見利忘義繼宏曰吾儕小人也若不因利乘便以求富貴畢世以來未可得志也及漢祖征杜重威至德清軍繼宏來朝乃正授節旄是歲就加檢校太傅節度判官張易每見繼宏不法必切言之繼宏以爲輕已乾祐中因事誣奏殺之尋又害觀察推官張制漢末移鎮貝州就加檢校太尉廣順初加同平章事三月六日移鎮河陽會永壽節入覲遇疾卒于京師詔贈侍中子永昌仕皇朝歷內諸司使



馮暉魏州人也始爲効節軍士拳勇騎射行伍憚之初  
事楊師厚爲隊長唐莊宗入魏以銀槍効節爲親軍與  
梁人對壘河上暉以犒給稍薄因竄入南軍梁將王彥  
章寘之麾下莊宗平河南暉首罪赦之從明宗征潞州  
誅楊立有功又從魏王繼岌伐蜀蜀平授夔州刺史時  
荊州高季興叛以兵攻其城暉拒之屢敗荆軍長興中  
爲興州刺史以乾渠爲治所會兩川叛蜀人來侵暉以  
衆寡不敵奔歸鳳翔朝廷怒其失守詔于同州衙職安  
置未幾從晉高祖討蜀蜀人守劍門領部下兵踰越險  
阻從他道出于劍門之左掩擊之殺守兵殆盡會晉祖

班師朝廷以暉爲澶州刺史晉天福初范延光據鄴叛  
以暉爲馬步都將孫銳爲監軍自六明鎮渡河將襲滑  
臺尋爲官軍所敗暉退歸鄴爲延光城守明年秋暉因  
出戰而降授滑州節度使檢校太傅鄴平移鎮靈武初  
張希崇鎮靈州以久在蕃疆頗究邊事數年之間侵盜  
並息希崇卒未有主帥蕃部寇鈔無復畏憚朝廷以暉  
強暴之名聞于遐徼故以命之及暉到鎮大張宴席酒  
殺豐備部衆告醉爭陳獻賀暉皆以錦綵酬之蕃情大  
悅党項拓拔彥昭者州界部族之大者暉至來謁厚加  
待遇仍爲治第豐其服玩因畱之不令歸部河西羊馬



由是易為交市暉募年得馬五千匹而蕃部歸心朝議

患之隆平集藥元福傳西戎三族攻靈州命元福佐朔方節度使馮暉討之朔方距威州七百里地無水草謂之旱海攜糧至暉食盡詰朝行四十里而敵騎數

萬扼要路暉大懼遣人致賂求成雖許及日中猶未決暉曰奈何元福曰彼正欲困我耳察其勢敵雖眾特依

西山而陣者其精兵也請以驍銳先薄西山彼或少怯當舉黃旗為識暉

善其謀斬馘殆盡晉開運初桑維翰輔政欲圖大舉以

制北方命將佐十五人皆列藩之帥也惟暉不預其數

乃上章自陳且言未老可用而制書見遺詔報云非制

書忽忘實以朔方重地蕃部窺邊非卿雄名何以彈壓

比欲移卿內地受代亦須奇才暉得詔甚喜又達情乞

移鎮邠州即以節旄授之行未及邠又除陝州暉獻馬

千匹駝五百頭在陝未幾除侍衛步軍都指揮使兼領

河陽即以王令溫為靈武節度使暉既典禁兵兼領近

鎮為朝廷縻留頗悔離靈武及馮玉李彥韜用事暉善

奉之未幾復以暉為朔方節度使加檢校太師漢高祖

革命就加同平章事隱帝嗣位加兼侍中國初加中書

令封陳留王廣順三年夏病卒年六十追贈衛王子繼

業朔方衙內都虞候暉亡三軍請知軍府事因授檢校

太保充朔方兵馬留後皇朝乾德中移于內地今為同

州節度使

高允權延州人祖懷遷本郡牙將懷遷生二子長曰萬



與次日萬金梁唐之間爲延州節度使卒于鎮允權卽  
萬金子也雖出于將門不嫻武藝起家爲義川主簿歷  
膚施縣令罷秩歸延州之第晉開運末以周密爲延帥  
延有東西二城其中限以深澗及契丹入汴一日州兵  
亂攻密密固守東城亂兵旣無帥亦無敢爲帥者或曰  
取高家西宅郎君爲帥可也是夜未曙允權方寢亂軍  
排闥請知畱後事遂居于西城與密相拒數日河東遣  
供奉官陳光穗宣撫河西允權乃遣支使李彬奉表太  
原周密棄東城而去漢祖遣使就加允權檢校太傅仍  
正授旄鉞漢祖入汴允權屢修貢奉隱帝卽位加檢校

太尉同平章事允權與夏州李彝興不協其年李守貞  
據河中叛密構彝興爲援及朝廷用兵夏州軍逼延州  
允權上章論列彝興亦紛然自訴朝廷賜詔和解之太  
子太師致仕劉景巖允權妻之祖也退老于州之別墅  
景巖舊事高氏爲牙校亦嘗爲延帥甚得民心景巖以  
允權婚家後輩心輕之允權恒忌其強是歲冬盡殺景  
巖之家收其家財萬計以謀叛聞朝廷不能辨關西賊  
平方面例覃恩命就加允權檢校太師太祖卽位加兼  
侍中廣順三年春卒其子紹基匿喪久之又擅主軍政  
欲邀承襲觀察判官李彬以爲不可當聽朝旨紹基與



羣小等惡其異議乃殺彬給奏云彬接構內外謀殺都指揮使及行軍副使自據城池已誅戮訖其妻子及諸房骨肉尋令捕繫次太祖聞之詔並釋之仍令都送汝州安置後朝廷令六宅使張仁謙往巡檢紹基乃發喪以聞輟視朝兩日

折從阮字可久本名從遠避漢高祖舊名下一字故改焉代家雲中父嗣倫爲麟州刺史累贈太子太師從阮性溫厚弱冠居父喪以孝聞唐莊宗初有河朔之地以代北諸部屢爲邊患起從阮爲河東牙將領府州副使同光中授府州刺史長興初入朝明宗以從阮洞習邊

事加檢校工部尚書復授府州刺史晉高祖起義以魏丹有援立之恩賂以雲中河西之地從阮由是以郡北屬旣而契丹欲盡徙河西之民以實遼東人心大擾從阮因保險拒之晉少帝嗣位北絕邊好乃遣使持詔諭從阮令出師明年春從阮率兵深入邊界連拔十餘砦開運初加檢校太保遷本州團練使其年兼領朔州刺史安北都護振武軍節度使契丹西南面行營馬步都虞候漢祖建號晉陽引兵南下從阮率衆歸之尋升府爲永安軍析振武之勝州並沿河五鎮以隸焉授從阮光祿大夫檢校太尉永安軍節度府勝等州觀察處置



等使仍賜功臣名號乾祐元年加特進檢校太師明年春從阮舉族入覲朝廷命其子德展爲府州團練使授從阮武勝節度使太祖受命加同平章事尋移鎮滑州又改陝州二年冬授靜難軍節度使世宗卽位就加兼侍中以年老上章請代優詔許之顯德二年冬赴闕行次西京以疾卒時年六十四制贈中書令

王饒字受益慶州華池人也父柔以饒貴累贈太尉饒沈毅有才幹始事晉高祖天福初授控鶴軍使稍遷奉國軍校累加檢校尙書左僕射六年從杜重威平常山以功加檢校司空遷本軍都校領鄆州刺史時安從進

叛于襄陽晉祖命高行周率兵討之以饒爲行營步軍都指揮使賊平授深州刺史逾年復入爲奉國都校加檢校司徒領欽州刺史未幾改本軍右廂都指揮使領閬州團練使晉末契丹據中原漢祖建義于晉陽尋克復諸夏惟常山郡爲契丹所據時饒在其郡乃與李筠白再榮之儔承間竊發盡逐其黨漢祖嘉之授鄜州觀察畱後加光祿大夫賜爵開國侯復移授鎮國軍節度使加檢校太傅國初就加同平章事賜推誠奉義翊戴功臣顯德初以郊丘禮畢加檢校太尉移鎮貝州世宗嗣位加兼侍中改彰德軍節度使滿歲受代入奉朝請



顯德四年冬以疾卒于東京之私第年五十九追封巢國公饒性寬厚體貌詳雅所莅藩鎮民皆便之每接賓佐必怡聲緩氣恂恂如也故士君子亦以此多之

孫方諫鄭州清苑縣人也本名方簡廣順初以犯廟諱故改焉定州西北二百里有狼山山上有堡邊人賴之以避剽掠之患因中置佛舍有尼深意者俗姓孫氏主其事以香火之教聚其徒聲言尸不壞因復以衣襟贍禮信奉有同其生方諫即其宗人也嗣行其教率眾不食葷茹其黨推之為若主晉開運初定帥表為邊界遊奕使宋史孫行友傳方諫懼主帥捕逐乃表歸朝因署為東北面招收指揮使且賜院額曰勝福每契丹

軍來必率其徒襲擊之鎧丈畜產所得漸多人益依以避難焉易定帥聞于朝因以方諫為邊界遊奕使行友副之自是捍禦多所殺獲乘勝入祁溝關平庸城破飛狐塞契丹頗畏之求請多端因少不

得志潛通于契丹契丹之入中原也以方諫為定州節度使尋以其將耶律忠代之改方諫雲州節度使方諫恚憤與其黨歸狼山不受契丹命漢初契丹隳定州城壘燒焚廬舍盡驅居民而北中山為之一空方諫自狼山率其部眾迴保定州上表請命漢祖嘉之即授以節鉞累官至使相太祖受命加兼侍中未幾改華州節度使朝廷以其弟行友為定州留後

宋史云行友上言偵得契丹離合願得勁兵三千乘間平定幽州乃移方又以弟議為德州刺史

乾隆四十九年校刊

舊唐書卷三十五

列傳

十一



兄弟子姪職內廷者凡數人世宗嗣位史彥超代之車  
 駕駐蹕于并門方諫自華觀于行在從大駕南巡以疾  
 就醫于洛下尋授同州節度使加兼中書令未及赴任  
 以疾卒于洛陽年六十二輟視朝兩日詔贈太師其弟  
 行友繼為定州節度皇朝乾德中以其妖妄惑眾詔毀  
 狼山佛寺遷其尼朽骨赴京遣焚于北郊以行友為諸  
 衛大將軍自是祇徒遂息焉續通鑑長編建隆二年八  
孫行友在鎮逾八年而狼山妖尼深意黨益盛上初即  
位行友不自安累表乞解官歸山上不許行友懼乃繕  
治甲兵將棄其帑還據山寨以叛兵馬都監樂繼能密  
奏其事上遣閣門副使武懷節馳會鎮趙之兵偽稱  
巡邊直入定州行友不之覺既而出詔示之令舉族歸  
朝行友倉皇聽命既至命侍御史李維岳即訊得實已

西制削奪行友官爵禁錮私第取尼深意尸焚之都城  
西北隅行友弟易州刺史方進姪保塞軍使全暉皆詣  
闕待罪  
詔釋之

史臣曰昔晉之季也敵騎長驅中原無主漢祖雖思拯  
 溺未果圖南趙暉首變陝郊同扶義舉漢之興也暉有  
 力焉命以作藩斯無媿矣守恩乘時効順雖有可觀好  
 利殘民夫何足貴允權方諫因版蕩之世竊屏翰之權  
 比夫畫雲臺之功臣何相去之遠也



舊五代史卷一百二十五

舊五代史卷一百二十五攷證

周列傳五高允權傳祖懷遷 懷遷原本作懷遠今據

歐陽史改正

孫方諫傳又以弟議爲德州刺史 弟議宋史作行義



舊五代史卷一百二十五攷證

舊五代史卷一百二十六

宋門下侍郎參知政事監修國史薛居正等撰

周書第十七

列傳六

馮道字可道瀛州景城人其先爲農爲儒不恒其業道少純厚好學善屬文不恥惡衣食負米奉親之外惟以披誦吟諷爲事雖大雪擁戶凝塵滿席湛如也天祐中劉守光署爲幽州掾守光引兵伐中山訪于僚屬道常以利害箴之守光怒寘于獄中尋爲人所救免守光敗遁歸太原監軍使張承業辟爲本院巡官承業重其文



章履行甚見待遇時有周元豹者善人倫鑒與道不洽  
謂承業曰馮生無前程公不可過用時河東記室盧質  
聞之曰我曾見杜黃裳司空寫真圖道之狀貌酷類焉  
將來必副大用元豹之言不足信也承業尋薦爲霸府  
從事俄署太原掌書記時莊宗併有河北文翰甚繁一  
以委之莊宗與梁軍夾河對壘一日郭崇韜以諸校伴  
食數多主者不辦請少罷減莊宗怒曰孤爲効命者設  
食都不自由其河北三鎮令三軍別擇一人爲帥孤請  
歸太原以避賢路遽命道對面草詞將示其衆道執筆  
久之莊宗正色促焉道徐起對曰道所掌筆硯敢不供

職今大王屢集大功方平南寇崇韜所諫未至過當阻  
拒之則可不可以向來之言誼動羣議敵人若知謂大  
王君臣之不和矣幸熟而思之則天下幸甚也俄而崇  
韜入謝因道爲之解焉人始重其膽量莊宗卽位鄴宮  
除省郎充翰林學士自綠衣賜紫梁平遷中書舍人戶  
部侍郎丁父憂持服于景城談苑道聞父喪卽徒步見  
星以行家人從後持衣囊  
追及之遇歲儉所得俸餘悉賑于鄉里道之所居惟蓬茨  
而已凡牧宰饋遺斗粟匹帛無所受焉時契丹方盛素  
聞道名欲掠而取之會邊人有備獲免明宗入洛遽謂  
近臣安重誨曰先帝時馮道郎中何在重誨曰近除翰



林學士明宗曰此人朕素諳委甚好宰相俄拜端明殿  
 學士端明之號自道始也未幾遷中書侍郎刑部尚書  
 平章事凡孤寒士子抱才業素知識者皆與引用唐末  
 衣冠履行浮躁者必抑而鎮之有工部侍郎任贊因班  
 退與同列戲道于後曰若急行必遺下兔園策道尋知  
 之召贊謂曰兔園策皆名儒所集道能諷之中朝士子  
 止看文場秀句便為舉業皆竊取公卿何淺狹之甚耶  
 贊大愧焉歐陽史云兔園策者鄉校俚儒教田夫牧子  
 之所誦也北夢瑣言云兔園策乃徐庾文體  
 非鄙朴之談但家藏一本人多賤之困學紀聞云兔園  
 策府三十卷唐蔣王暉令僚佐杜嗣先倣應科目策自  
 設問對引經史為訓注暉太宗子故用復有梁朝宰臣  
 梁王兔園名其書馮道兔園策謂此也

李琪每以文章自擅曾進賀平中山王都表云復真定  
 之逆賊道讓琪曰昨來收復定州非真定也琪昧于地  
 理頓至折角其後百僚上明宗徽號凡三章道自為之  
 其文渾然非流俗之體舉朝服焉道尤長于篇詠秉筆  
 則成典麗之外義含古道必為遠近傳寫故漸畏其高  
 深由是班行肅然無澆漓之態繼改門下侍郎戶部吏  
 部尚書集賢殿宏文館大學士加尚書左僕射封始平  
 郡公一日道因上謁既退明宗顧謂侍臣曰馮道性純  
 儉頃在德勝寨居一茅菴與從人同器食臥則芻藁一  
 束其心晏如也及以父憂退歸鄉里自耕樵採與農夫



雜處略不以素貴介懷真士大夫也天成長興中天下  
屢稔朝廷無事明宗每御延英畱道訪以外事道曰陛  
下以至德承天天以有年表瑞更在日慎一日以答天  
心臣每記在先皇霸府日曾奉使中山徑井陘之險憂  
馬有蹶失不敢怠于銜轡及至平地則無復持控果爲  
馬所顛仆幾至于損臣所陳雖小可以喻大陛下勿以  
清晏豐熟便縱逸樂兢兢業業臣之望也明宗深然之  
他日又問道曰天下雖熟百姓得濟否道曰穀貴餓農  
穀賤傷農此常理也臣憶得近代有舉子聶夷中傷田  
家詩云二月賣新絲五月糶秋穀醫得眼下瘡剗卻心

頭肉我願君王心化作光明燭不照綺羅筵徧照逃亾  
屋明宗曰此詩甚好遽命侍臣錄下每自諷之道之發  
言簡正善于裨益非常人所能及也時以諸經舛繆與  
同列李愚委學官田敏等取西京鄭覃所刊石經彫爲  
印版流布天下後進賴之明宗崩唐末帝嗣位以道爲  
山陵使禮畢出鎮同州循故事也道爲政閒澹獄市無  
撓一日有上介胡饒本出軍吏性麤獷因事詬道于牙  
門左右數報不應道曰此必醉耳因召入開尊設食盡  
夕而起無撓慍之色未幾入爲司空及晉祖入洛以道  
爲首相二年契丹遣使加徽號于晉祖晉祖亦獻徽號



于契丹謂道曰此行非卿不可道無難色晉祖又曰卿

官崇德重不可深入沙漠道曰陛下受北朝恩臣受陛

下恩有何不可談苑云道與諸相歸中書食訖外廳堂

取紙一幅署云道去即遣寫勅進堂吏泣下道遣人語

妻子不復歸家即日舍都亭驛不數日北行晉祖餞宴

語以家國之故煩者德遠及行將達西樓契丹主欲郊

迎其臣曰天子無迎宰相之禮因止焉其名動遠俗也

如此禮道皆得之作詩以紀曰牛頭偏得賜象笏更容

持契丹主甚喜遂潛諭留意道曰南朝為于外豈有分

別哉道在契丹凡得所賜悉以市薪炭徵其意云北地

乃遣歸道三上表乞留固遣乃去猶更住館中月餘既

行所至留駐凡兩月方出境左右語道曰當北土得生

還恨無羽翼公獨宿留何也道曰縱急還彼以筋腳馬

一夕即追及亦何可脫但徐緩即不及還朝廷廢樞密

能測矣眾乃服四年二月始至京師使依唐朝故事並歸中書其院印付道事無巨細悉以

歸之尋加司徒兼侍中進魯國公晉祖曾以用兵事問

道道曰陛下歷試諸艱創成大業神武睿畧為天下所

知討伐不庭須從獨斷臣本自書生為陛下在中書守

歷代成規不敢有一毫之失也臣在明宗朝曾以戎事

問臣臣亦以斯言答之晉祖頗可其說道嘗上表求退

晉祖不之覽先遣鄭王就省謂曰卿來日不出朕當親

行請卿道不得已出焉當時寵遇無與為比晉少帝即

位加守太尉進封燕國公道嘗問朝中熟客曰道之在



政事堂人有何說客曰是非相半道曰凡人同者爲是不同爲非而非道者十恐有九昔仲尼聖人也猶爲叔孫武叔所毀况道之虛薄者乎然道之所持始終不易後有人問道于少帝曰道好平時宰相無以濟其艱難如禪僧不可呼鷹耳由是出道爲同州節度使歲餘移鎮南陽加中書令契丹入汴道自襄鄧召入契丹主從容問曰天下百姓如何可救道曰此時百姓佛再出救不得惟皇帝救得其後衣冠不至傷夷皆道與趙延壽陰護之所至也是歲三月隨契丹北行與晉室公卿俱抵常山俄而比主卒永康王代統其衆及北去留其族

嘉里以據常山時漢軍憤激因共逐出嘉里尋復其城道率同列四出按撫因事從宜各安其所人或推其功道曰儒臣何能爲皆諸將之力也道以德重人所取則乃爲衆擇諸將之勤宿者以騎校白再榮權爲其帥軍民由是帖然道首有力焉道在常山見有中國士女爲契丹所俘者出橐裝以贖之皆寄于高尼精舍後相次訪其家以歸之又契丹先留道與李崧和凝及文武官等在常山是歲閏七月二十九日契丹有詔追崧令選朝士十人赴木葉山行事北帥滿達勒召道等至帳所欲諭之崧偶先至知其意懼形于色滿達勒將以明日



與朝士齊遣之崧乃不俟道與凝先出既而相遇于帳門之外因與分首俱歸俄而李筠等縱火與契丹交鬪鼓槩相及是日若齊至與滿達勒相見稍或躊躇則悉為俘矣時論者以道布衣有至行立公朝有重望其陰報昭感多此類也及自常山入覲漢祖嘉之拜守太師洛陽搢紳舊聞記贈大監張公璨漢祖即位之初為上黨戎判漢祖在北京時大聚甲兵禁牛皮不得私貿易及民間盜用之如有牛死即時官納其皮其有犯者甚眾及即大位三司舉行請禁天下牛皮者二十餘人獄成罪俱當天大監時為判官獨執曰主上欽明三司不合如此起請二在河東大聚甲兵須藉牛皮嚴禁之可也今為天下君何少牛皮立法至于外皆惡之曰豈有州郡使敢用事執政之地除馮瀛王外皆惡之曰豈有州郡使敢

非朝廷詔勅力言于漢祖漢祖亦怒曰昭義一判官是何敢未下獨瀛王非時請見漢祖出瀛王曰陛下下死時斷牛皮可也今既有天下一牛皮不合禁陛下東死時斷牛皮可也今既有天下一牛皮不合禁陛下枉死之亦足為陛下惜昭義判官以卑位食陛下祿居陛下官不惜軀命敢執而奏之可賞不可殺臣當弼之任使此敕枉害天下人性命臣不能早奏使陛下臣罪當誅稽首再拜又曰張璨不合加罪望加赦之漢祖曰之曰已行之矣馮瀛王曰勅未下漢祖遠曰與赦之馮曰勒停可乎上曰可由是改其敕記其畧曰三司邦計國法攸依張璨體事未明執理乖當宜停見職日中書自命放之大監聽宣敕訖聞敕云執理乖當尙外道判官執理則焉用彼相手乾祐中道奉朝請外平居自適一日著長樂老自敘云余世家宗族本始平長樂二郡歷代之名實具載于國史家牒余先自燕亡歸晉事莊宗明宗閔帝清泰帝又事晉高祖皇帝少帝契

晉事莊宗明宗閔帝清泰帝又事晉高祖皇帝少帝契



丹據汴京爲北主所制自鎮州與文武臣僚馬步將士歸漢朝事高祖皇帝今上顧以久叨祿位備歷艱危上顯祖宗下光親戚亡曾祖諱湊累贈至太傅亡曾祖母崔氏追封梁國太夫人亡祖諱炯累贈至太師亡祖母褚氏追封吳國太夫人亡父諱良建祕書少監致仕累贈至尚書令母張氏追封魏國太夫人余階自將仕郎轉朝議郎朝散大夫銀青光祿大夫金紫光祿大夫特進開府儀同三司職自幽州節度巡官河東節度巡官掌書記再爲翰林學士改授端明殿學士集賢殿大學士太微官使再爲宏文館大學士又充諸道鹽鐵轉運

使南郊大禮使明宗皇帝晉高祖皇帝山陵使再授定國軍節度同州管內觀察處置等使一爲長春宮使又授武勝軍節度鄧隨均房等州管內觀察處置等使官自攝幽府參軍試大理評事檢校尚書祠部郎中兼侍御史檢校吏部郎中兼御史中丞檢校太尉同中書門下平章事檢校太師兼侍中又授檢校太師兼中書門正官自行臺中書舍人再爲戶部侍郎轉兵部侍郎中書侍郎再爲門下侍郎刑部吏部尚書右僕射三爲司空兩在中書一守本官又授司徒兼侍中賜私門十六戟又授太尉兼侍中又授戎太傅又授漢太師爵自開



國男至開國公魯國公再封秦國公梁國公燕國公齊國公食邑自三百戶至一萬一千戶食實封自一百戶至一千八百戶勲自柱國至上柱國功臣各自經邦致理翊贊功臣至守正崇德保邦致理功臣安時處順守義崇靜功臣崇仁保德寧邦翊聖功臣先娶故德州戶掾褚諱瀆女早亡後娶故景州弓高縣孫明府諱師禮女累封蜀國夫人亡長子平自祕書郎授右拾遺工部度支員外郎次子吉自祕書省校書郎授膳部金部職方員外郎屯田郎中第三亡子可自祕書省正字授殿中丞工部戶部員外郎第四子幼亡第五子義自祕書

郎改授銀青光祿大夫檢校國子祭酒兼御史中丞充定國軍衙內都指揮使職罷改授朝散大夫左春坊太子司議郎太常丞第六子正自協律郎改授銀青光祿大夫檢校國子祭酒兼御史中丞充定國軍節度使職罷改授朝散大夫太僕丞長女適故兵部崔侍郎諱衍子太僕少卿名絢封萬年縣君三女子早亡二孫幼亡唐長興二年勅瀛州景城縣莊來蘇鄉改爲元輔鄉朝漢里爲孝行里洛南莊貫河南府洛陽縣三州鄉靈臺里奉晉天福五年勅三州鄉改爲上相鄉靈臺里改爲中台里時守司徒兼侍中又奉八年勅上相鄉改爲太



尉鄉中台里改爲侍中里時守太尉兼侍中靜思本末  
慶及存亡蓋自國恩盡從家法承訓誨之旨關教化之  
源在孝于家在忠于國口無不道之言門無不義之貨  
所願者下不欺于地中不欺于人上不欺于天以三不  
欺爲素賤如是貴如是長如是老如是事親事君事長  
臨人之道曠蒙天恕累經難而獲多福曾陷蕃而歸中  
華非人之謀是天之祐六合之內有幸者百歲之後有  
歸所無以珠玉含當以時服斂以籩條葬及擇不食之  
地而葬焉以不及于古人故祭以特羊戒殺生也當以  
不害命之物祭無立神道碑以三代墳前不獲立碑故

無請謚號以無德故又念自賓佐至王佐及領藩鎮時  
或有微益于國之事節皆形于公籍所著文章篇詠因  
多事散失外收拾得者編于家集其間見其志知之者  
罪之者未知衆寡矣有莊有宅有羣書有三子可以襲  
其業于此日五盟日三省尚猶日知其所亡月無忘其  
所能爲子爲弟爲人臣爲師長爲夫爲父有子有猶子  
有孫奉身卽有餘矣爲時乃不足不足者何不能爲大  
君致一統定八方誠有愧于歷職歷官何以答乾坤之  
施時開一卷時飲一杯食味別聲被色老安于當代耶  
老而自樂何樂如之時乾祐三年朱明月長樂老叙云



及太祖平內難議立徐州節度使劉贊爲漢嗣遣道與  
祕書監趙上交樞密直學士王度等往迎之道尋與贊  
自徐赴汴行至宋州會澶州軍變樞密使王峻遣郭崇  
領兵至屯于衙門外時道與上交等宿于衙內是日贊  
率左右甲士闔門登樓詰崇所自崇言太祖已副推戴  
左右知其事變以爲爲道所賣皆欲殺道等以自快趙  
上交與王度聞之皆惶怖不知所爲惟道偃仰自適略  
無懼色尋亦獲免焉道微時嘗賦詩云終聞海嶽歸明  
主未省乾坤陷吉人至是其言驗矣青箱雜記載馮道  
詩全篇云莫爲危  
時便愴神前程往往有期因終聞海嶽歸明主未省乾  
坤陷吉人道德幾時曾去世舟車何處不通津但教方

寸無諸惡狠虎  
叢中也立身

廣順初復拜太師中書令太祖甚重之

每進對不以名呼及太祖崩世宗以道爲山陵使會河  
東劉崇入寇世宗召大臣議欲親征道諫止之世宗因  
言唐初天下草寇蜂起並是太宗親平之道奏曰陛下  
得如太宗否世宗怒曰馮道何相少也乃罷及世宗親  
征不及扈從畱道奉太祖山陵時道已抱疾及山陵禮  
畢奉神主歸舊宮未及祔廟一夕薨于其第時顯德元  
年四月十七日也享年七十有三世宗聞之輟視朝三  
日冊贈尚書令追封瀛王諡曰文懿道歷任四朝三入  
中書在相位二十餘年以持重鎮俗爲已任未嘗以片



簡于諸侯平生甚廉儉逮至末年閨庭之內稍徇奢  
靡其子吉尤恣狂蕩道不能制識者以其不終令譽咸  
歎惜之五代史補馮道之鎮同州也有酒務吏乞以家  
財修夫子廟道以狀付判官參詳其事判官素  
滑稽因以絕書判後云荆棘森遶杏壇儒官高貴  
盡偷安若教酒務修夫子覺我慙惶也大難道覽之有  
愧色因出傳重創之馬濂王道之在中書也舉子  
李導投贊所業馮相不見之戲謂曰老夫名道其來久矣  
加以累居相府秀才無寸底道字小然亦名導于禮可乎  
李抗聲對曰相公是無寸底道字小然亦名導于禮可乎  
謂不可也公笑曰老夫無寸底道字小然亦名導于禮可乎  
可謂知人矣了無怒色馮吉濂王道之子能彈琵琶  
以皮為絃世宗嘗令彈于御前深欣善之因號其琵琶  
曰遶殿雷也道以其惰業每加譴責而吉攻之愈精道  
益怒凡與客飲必使其庭立而彈之曲罷或賜以束帛命  
背負之然後致謝道自以為戒勗極矣吉未能改既  
而益自若道無可奈何歎曰百工之司藝而身賤  
理使然也此子不過太常少卿耳其後果終于此

史臣曰道之履行鬱有古人之風道之字量深得大臣  
之體然而事四朝相六帝可得為忠乎夫一女二夫人  
之不幸況于再三者哉所以飾終之典不得諡為文貞  
文忠者蓋謂此也



舊五代史卷一百二十六

舊五代史卷一百二十六攷證

周列傳六馮道傳諡日文懿 案五代通錄作諡文愍

見通鑑攷異

嘉里舊作解里今改 滿達勒舊作麻荅今改



舊五代史卷一百二十六攷證

舊五代史卷一百二十七

宋門下侍郎參知政事監修國史薛居正等撰

周書第十八

列傳七

盧文紀字子持京兆萬年人

案此下有闕文

長興末為太常卿

文紀形貌魁偉語音高朗占對鏗鏘健于飲啖奉使蜀川路由岐下時唐末帝為岐帥以主禮待之觀其儀形旨趣遇之頗厚清泰初中書闕輔相末帝訪之于朝左右曰臣見班行中所譽當大拜者姚覲盧文紀崔居儉耳或品藻三人才行其心愈惑末帝乃俱書當時清望



達官數人姓名投琉璃餅中月夜焚香禱請于天旭日以筋挾之首得文紀之名次卽姚顛末帝素已竒待歡然命之卽授中書侍郎同平章事與姚顛同升相位時朝廷兵革之後宗社甫寧外寇內侵強臣在境文紀處經綸之地無輔弼之謀所論者親愛朋黨之小瑕所糾者銓選擬掄之微類時有蜀人史在德爲太常丞出入權要之門評品朝士多有譏彈乃上章云文武兩班宜選能進用見在軍都將校朝廷士大夫並請閱試澄汰能者進用否者黜退不限名位高下疏下中書文紀以爲非已怒甚召諫議盧損爲覆狀辭旨蕪漫爲衆所嗤

三年夏晉祖引契丹拒命旣而大軍挫衄官寨受圍八月親征過徽陵拜于闕下休于仗舍文紀扈從帝顧謂之曰朕聞主憂臣辱予自鳳翔來首命卿爲宰相聽人所論將爲便致太平寇孽紛紛令萬乘自行戰賊于汝安乎文紀惶恐致謝時末帝季年天奪其魄聲言救寨其實倦行初次河陽召文紀張延朗謀議文紀曰敵騎倏往忽來無利則去大寨牢固足以枝梧況已有三處救兵可以不戰而解使人督促責以成功輿駕且駐河橋詳觀事勢況地處舟車之要正當天下之心必若未能解圍去亦非晚會延朗與趙延壽欵密傍奏曰文紀



之言是也故令延壽北行末帝坐俟其敗晉祖入洛罷相爲吏部尚書再遷太子少傅少帝嗣位改太子太傅漢祖登極轉太子太師時朝官分司在洛雖有留臺御史紀綱亦多不整肅遂敕文紀別令檢轄侍御史趙礪及糾分司朝臣中有行香拜表疎怠者楊邠怒凡疾病不在朝謁者皆與致仕官時文紀別令檢轄之職頗甚滋章因疾請假復爲留臺所奏遂以本官致仕歐陽史周太祖入立即拜廣順元年夏卒年七十六贈司徒輟視朝一司空于家日文紀平生積財巨萬及卒爲其子龜齡所費不數年間以至蕩盡由是多藏者以爲誡焉

馬裔孫字慶先棣州商河人

案此下有闕文

唐末帝卽位用爲

翰林學士戶部郎中知制誥賜金紫未滿歲改中書舍人禮部侍郎皆帶禁職尋拜中書侍郎平章事裔孫純儒性多凝滯遽登相位未悉朝廷舊事初馮道罷同州入朝拜司空唐朝故事三公爲加官無單拜者是時朝議率爾命道制出或曰三公正宰相便合參大政又云合受冊衆言藉藉盧文紀又欲祭祀時便令掃除馮道聞之曰司空掃除職也吾無所憚旣而知非乃止劉昫爲僕射性剛羣情嫉之乃共贊右常侍孔昭序論行香次第言常侍侍從之臣行立合在僕射之前疏奏下御



史臺定例同光已來李琪盧質繼爲僕射質性輕脫不能守師長之體故昭序輕言裔孫以羣情不悅劉昫馮道欲微抑之乃責臺司須檢則例而臺吏言舊不見例據南北班位卽常侍在前俄屬國忌將就列未定裔孫卽判臺狀曰既有援據足可遵行各示本官劉昫怒揮袂而退自後日責臺司定例崔居儉謂南宮同列曰從昭序言語是朝廷人總不解語也且僕射師長也中丞大夫就班修敬常侍班在南宮六卿之下况僕射乎已前騎省年深望南宮二侍郎如仰霄漢癡人舉止何取笑之深耶衆聞居儉言紛議稍息文士哂裔孫堂判有

援據二字其中書百職裔孫素未諳練無能專決但署名而已又少見賓客時人目之爲三不開謂口不開印不開門不開也及太原事起唐末帝幸懷州裔孫留司在洛未幾趙德鈞父子有異志官若危急君臣計無所出俄而裔孫自洛來朝衆相謂曰馬相此來必有安危之策旣至獻綾三百疋卒無獻可之言晉祖受命廢歸田里裔孫好名慕韓愈之爲人尤不重佛及廢居里巷追感唐末帝平昔之遇乃依長壽僧舍讀佛書冀申冥報歲餘枕藉黃卷中見華嚴楞嚴詞理富贍由是酷賞之仍抄撮之相形于歌詠謂之法喜集又纂諸經要言



爲佛國記凡數千言或嘲之曰公生平以傳奕韓愈爲高識何前倨而後恭是佛佞公耶公佞佛耶裔孫笑而荅曰佛佞予則多矣李崧相晉用李專美爲贊善裔孫以賓客致仕專美轉少卿裔孫得太子詹事晉漢公卿以裔孫好爲文章皆欣然待之太祖卽位就加檢校禮部尙書太子賓客分司在洛每閉關養素惟事謳吟著述嗜八分書題尺酬答必親札以銜其墨蹟裔孫將卒之前覩白虺緣于庭槐驅之失所在裔孫感賦鵬之文作槐蟲賦以見志廣順三年秋七月卒于洛陽詔贈太子少傅輟視朝一日裔孫初爲河中從事因事赴闕宿

于邏店其地有上邏神祠夜夢神見召待以優禮手授二筆其筆一大一小覺而異焉及爲翰林學士裔孫以爲契鴻筆之兆旋知貢舉私自謂曰此二筆之應也洎入中書上事堂吏奉二筆熟視大小如昔時夢中所授者及卒後旬日有侍婢靈語一如裔孫聲氣處分家事皆有倫理時人奇之

和凝字成績汝陽須昌人也九代祖逢堯唐高宗時爲監察御史自逢堯之下仕皆不顯曾祖敞祖濡皆以凝貴累贈太師父矩贈尙書令矩性嗜酒不拘禮節雖素不知書見士未嘗有慢色必罄家財以延接凝幼而聰



敏姿狀秀拔神采射人少好學書一覽者咸達其大義  
年十七舉明經至京師忽夢人以五色筆一束以與之  
謂日子有如此才何不舉進士自是才思敏贍十九登  
進士第滑帥賀瓌知其名辟寘幕下疑善射時瓌與唐  
莊宗相拒于河上戰胡柳陂瓌軍敗而北惟疑隨之瓌  
顧日子勿相隨當自努力疑對曰丈夫受人知有難不  
報非素志也但恨未有死所旋有一騎士來逐瓌疑叱  
之不止遂引弓以射應弦而斃瓌獲免旣而謂諸子曰  
昨非和公無以至此和公文武全才而有志氣後必享  
重位爾宜謹事之遂以女妻之由是聲望益隆後歷鄆

鄧洋三府從事唐天成中入拜殿中侍御史歷禮部刑  
部員外郎改主客員外郎知制誥尋召入翰林充學士  
轉主客郎中充職兼權知貢舉貢院舊例放榜之日設  
棘于門及閉院門以防下第不逞者疑令徹棘啓門是

日寂無喧者所收多才名之士時議以爲得人

澠水燕談范質

初舉進士時和疑知貢舉疑常以宰輔自期登第之日  
名第十三人及覽質文尤加賞歎卽以第十三名處之  
場屋間謂之傳衣鉢若禪宗之相付授也後質果繼疑登相位

明宗益加器重遷中書

舍人工部侍郎皆充學士晉有天下拜端明殿學士兼  
判度支轉戶部侍郎會廢端明之職復入翰林充承旨  
晉祖每召問以時事言皆稱旨五年拜中書侍郎平章



事六年秋晉高祖將幸鄴都時襄州安從進反狀已彰  
疑乃奏曰車駕離闕安從進或有悖逆何以待之晉高  
祖曰卿意如何疑曰以臣料之先人有奪人之心臨事  
卽不及也欲預出宣勅十數道密付開封尹鄭王令有  
緩急卽旋填將校姓名令領兵擊之晉高祖從之及聞  
唐鄧奏報鄭王如所勅遣騎將李建崇監軍焦繼勳等  
領兵討焉相遇于湖陽從進出于不意甚訝其神速以  
至于敗由疑之力也少帝嗣位加右僕射開運初罷相  
守本官未幾轉左僕射漢興授太子太保國初遷太子  
太傅顯德二年秋以背疽卒于其第年五十八輟視朝

兩日詔贈侍中疑性好修整自釋褐至登台輔車服僕  
從必加華楚進退容止偉如也又好延納後進士無賢  
不肖皆虛懷以待之或致其仕進故甚有當時之譽平  
生爲文章長于短歌艷曲尤好聲譽有集百卷自篆于  
版模印數百帙分惠于人焉宋朝類苑和魯公疑有豔  
詞一編名香奩集疑後貴  
乃嫁其名爲韓偓今世傳韓偓香奩集乃疑所爲也疑  
生平著述分爲演綸遊藝孝悌疑獄香奩疑金六集自  
爲遊藝集序云予有香奩疑金二集不行于世疑在政  
府避議論諱其名又欲後人知故于遊藝集序實之此  
疑之意也長子峻卒于省郎次子峴錦繡萬花谷范蜀公蒙  
求云和峴晉相和疑之  
子峴生會疑入翰林加金紫知貢舉疑喜曰我生  
平美事三者併集此子宜于我矣因名曰三美  
朝爲司勳員外郎



蕪禹珪字元錫其先出于武功近世家高密今為郡人  
 也父仲容以儒學稱于鄉里唐末舉九經補廣文助教  
 遷輔唐令累贈太師禹珪性謙和虛襟接物克構父業  
 以五經中第辟遼州倅職歷青鄆從事轉潞并管記累  
 檢校官至戶部郎中漢高祖作鎮并門奏為兼判開運  
 未契丹入汴漢祖即位于晉陽授中書侍郎平章事漢  
 祖莅柝兼刑部尚書俄加右僕射集賢殿大學士漢祖  
 大漸與蘇逢吉楊邠等受顧命立少主明年轉左僕射  
 三年冬太祖入平內難禹珪遁入都城為兵士所擄翼  
 日太祖令人求之既見撫慰甚至尋復其位國初加守

司空尋罷相守本官世宗嗣位封莒國公未幾受代歸  
 第顯德三年正月旦與客對食之際暴疾而卒時年六  
 十二禹珪純厚長者遭遇漢祖及蘇逢吉夷滅禹珪恬  
 然無咎時人以為積善之報也子德祥登進士第累歷  
 臺省

景範淄州長山人 案此下有闕文據世宗紀景範父名初以戶部郎中致仕 世宗之

北征也命為東京副留守車駕迴自河東世宗以艱于  
 國用乃以範為中書侍郎平章事判三司 冊府元龜載世宗即位七

月癸巳制曰朕自履宸極思平泰階出一令慮下民之未從行一事懼上穹之罔祐晨與夕惕終歲于茲雖禮讓漸聞興行而風雨未之成若豈刑政之所闕而德教之未孚哉由是進用良臣輔宣皇化雖朕志先定亦與

乾隆四十九年校刊 舊唐書卷三十七 列傳



情具瞻爰擇嘉辰誕敷明命樞密院直學士中大夫尚書工部侍郎上柱國晉陽縣開國男食邑三百戶賜紫金魚袋範昔佐先帝每罄嘉謨逮事躬躬愈傾忠節奉上得大臣之體檢身為君子之儒一昨戎輅親征皇都闕今則靈臺偃革宣室圖功思先朝欲用之言成聖考得賢之美俾參大政仍掌利權爾其明聽朕言往敷洪化子欲則垂象而清品彙爾則順天道以叙彝倫子欲恤刑名而息戰爭爾則謹憲章而恢廟畧天人之際懸合軍民之事罔渝則國相之尊非爾孰處邦計之重惟材是臧勉思倜儻以致君勿效因循而保位竚聞成績用副虛懷可正議大夫中書侍郎平章事判三司範為人厚重剛正無所屈撓然理繁治劇非其所長雖悉心盡瘁終無稱職之譽世宗知之因其有疾乃罷司計尋以父喪罷相東歸顯德三年冬以疾卒于鄉里優詔贈侍中官為立碑焉

史臣曰夫以稽古之力取秉鈞之位者豈常人乎然文紀耽于貨殖裔孫傷于齷齪則知全其德者鮮矣如成績之文采元錫之履行景範之純厚皆得謂之君子儒矣以之爰立何用不臧



舊五代史卷一百二十七

舊五代史卷一百二十七攷證

周列傳七和凝傳欲預出宣敕十數道密付開封尹鄭  
王今有緩急卽旋填將校姓名令領兵擊之 案洛  
陽搢紳舊聞記作已命高行周爲招討張從恩爲都  
監仍令焦繼勳等數人備指使是晉祖未北征已命  
將校矣與是書異



舊五代史卷一百二十七攷證

舊五代史卷一百二十八

宋門下侍郎參知政事監修國史薛居正等撰

周書第十九

列傳八

王朴字文伯東平人也父序以朴貴贈左諫議大夫朴幼警慧好學善屬文漢乾祐中擢進士第解褐授校書郎依樞密使楊邠館于邠第是時漢室寢亂大臣交惡朴度其必危因乞告東歸未幾李業輩作亂害邠等三族凡遊其門下者多被其禍而朴獨免國初世宗鎮澶淵朝廷以朴爲記室及世宗爲開封尹拜右拾遺充開



封府推官世宗嗣位授比部郎中賜紫二年夏世宗命朝廷文學之士二十餘人各撰策論一首以試其才時朴獻平邊策云唐失道而失吳蜀晉失道而失幽并觀所以失之由知所以平之術當失之時莫不君暗政亂兵驕民困近者紆于內遠者叛于外小不制而至于大不制而至于僭天下離心人不用命吳蜀乘其亂而竊其號幽并乘其間而據其地平之之術在乎反唐晉之失而已必先進賢退不肖以清其時用能去不能以審其材恩信號令以結其心賞功罰罪以盡其力恭儉節用以豐其財徭役以時以阜其民俟其倉廩實器用

備人可用而舉之彼方之民知我政化大行上下同心力强財足人和將和有必取之勢則知彼情狀者願爲之間諜知彼山川者願爲之先導彼民與此民之心同是與天意同與天意同則無不成之功攻取之道從易者始當今吳國東至海南至江可撓之地二千里從少備處先撓之備東則撓西備西則撓東必奔走以救其弊奔走之間可以知彼之虛實衆之強弱攻虛擊弱則所向無前矣勿大舉但以輕兵撓之彼人怯知我師入其地必大發以來應數大發則必民困而國竭一不大發則我獲其利彼竭我利則江北諸州乃國家之所有



也既得江北則用彼之民揚我之兵江之南亦不難而平之也如此則用力少而收功多得吳則桂廣皆爲內臣岷蜀可飛書而召之如不至則四面並進席卷而蜀平矣吳蜀平幽可望風而至惟并必死之寇不可以恩信誘必須以強兵攻之然其力已喪不足以爲邊患可爲後圖候其便則一削以平之方今兵力精練器用具備羣下知法諸將用命一稔之後可以平邊此歲夏秋便可于沿邊貯納臣書生也不足以講大事至于不達大體不合機變望陛下寬之世宗覽之愈重其器識未幾遷左諫議大夫知開封府事初世宗以英武自任喜

言天下事常憤廣明之後中土日蹙值累朝多事尚未克復慨然有包舉天下之志而居常計事者多不喻其旨惟朴神氣勁峻性剛決有斷凡所謀畫動愜世宗之意由是急于登用尋拜左散騎常侍充端明殿學士知府如故是時初廣京城朴奉命經度凡通衢委巷廣袤之間靡不由其心匠及世宗南征以朴爲東京副留守車駕還京改戶部侍郎兼樞密副使未幾遷樞密使檢校太保頃之丁內艱尋起復授本官四年冬世宗再幸淮甸兼東京留守京邑庶務悉以便宜制之比及入蹕都下肅如也

默記引閑談錄云朴性剛烈大臣藩鎮皆憚之世宗收淮南俾朴留守時以街巷隘



狹例從展折朴怒廂校弛慢于通衢中鞭背數十其人  
忿然歎云宣補廂虞候豈得便從決朴微聞之命左右  
擒至立斃于馬前世宗聞之笑謂近臣曰此大  
愚人去王朴面前誇宣補廂虞候宜其死矣  
六年三月世宗令樹斗門于汴口不踰時而歸朝是日朴方過

前司空李穀之第交談之頃疾作而仆于座遽以肩昇  
歸第一夕而卒時年四十有五

默記王朴仕周世宗制禮作樂攷定聲律正星

歷修刑統百廢俱起又取三關取淮南皆朴為

謀然事世宗纔四年耳使假之壽考安可量也世宗聞

之駭愕即時幸其第及樞前以所執玉鉞卓地而慟者

數四贈賻之類率有加等優詔贈侍中

宋史王侁傳朴卒世宗幸其第

召見諸孤以侁為東頭供奉官朴性敏銳然傷于太剛每稠人廣座之

中正色高談無敢觸其鋒者故時人雖服其機變而無

恭懿之譽其筆述之外多所該綜至如星緯聲律莫不

畢殫其妙所撰大周欽天歷及律準並行于世

于禁中作功臣閣畫當時大臣如李穀鄭仁誨之屬太

祖即位一日過功臣閣風開半門正與朴象相對太祖

望見卻立聳然整御袍襟帶磬折鞠躬左右曰陛下貴

為天子彼前朝之臣禮何過也太祖以手指御袍云此

人在朕不得此袍著其敬畏如此五代史闕文周顯

德中朴與魏仁浦俱為樞密使時太祖皇帝已掌禁兵

一日有殿直乘馬誤衝太祖導從太祖自詣密地訴其

無禮仁浦令徽院勘詰朴謂太祖曰太祖自詣密地訴其

加使相殿直廷臣也與太尉比肩事主太尉況帶職不

見朴遺事今復補其大者況太祖太宗在位每稱朴有

上輔之器

朝列具聞

楊凝式華陰人也

游宦紀聞載凝式年譜云唐咸通十

乾隆四十九年校刊

書影印本

刊專

四



稱癸巳人又別傳 父涉唐末梁初再登台席罷相守左

僕射卒 歐陽史楊涉傳云祖收父嚴吳縝纂誤云收與

云唐修行楊氏系出越公房本出中山相結次子繼生

洛州刺史暉暉生河間太守恩恩生越恭公鈞出居馮

翊至藏器徙潯陽唐相楊收之父曰遺直生四子名皆

從又曰發假收嚴以四時為義故發之子名皆從木假

之子從火收之子從金嚴之子從水嚴生涉涉生疑式

而收乃藏器之兄涉之伯也新五代史記唐六臣傳乃

以收為涉之祖 疑式體雖最眇而精神穎悟 宣和書譜

嚴之父非也 貌寢悅然精神 富有文藻大為時輩所推唐昭宗朝登

矍然要大于身 進士第解褐授度支巡官再遷祕書郎直史館梁開平

中為殿中侍御史禮部員外郎三川守齊王張宗奭見

而嘉之請以本官充留守巡官梁相趙光允素重其才

奏為集賢殿直學士改考功員外郎唐同光初授比部

郎中知制誥尋以心疾罷去改給事中史館修撰判館

事明宗即位拜中書舍人復以心疾不朝而罷長興中

歷右常侍工戶二部侍郎以舊恙免改祕書監清泰初

遷兵部侍郎唐末帝按兵于懷覃疑式在扈從之列頗

以心恙諠譁于軍若末帝以其才名優容之詔遣歸洛

晉天福初改太子賓客尋以禮部尚書致仕閒居伊洛

之間恣其狂逸多所干忤自居守以降咸以俊才耆德

莫之責也晉開運中宰相桑維翰知其絕俸艱于家食

奏除太子少保分司于洛漢乾祐中歷少傅少師太祖

乾隆四十九年校刊



總兵疑式候于軍門且以年老不任戎事上訴太祖特為奏免之廣順中表求致政尋以右僕射得請顯德初

改左僕射又改太子太保並懸車元年冬卒于洛陽年

八十五詔贈太子太傅疑式長于歌詩別傳云疑式詩什亦多雜以談

諧少從張全義辟故作詩紀全義之德云洛陽風景實

堪哀昔日曾為瓦子堆不是我公重葺理至今猶自一

堆灰他類若此張從恩尹洛疑式自汴還時飛蝗蔽日

偶與之俱疑式先以詩寄曰押引蝗蟲到洛京合消郡

守遠相迎從恩弗怪也然疑式詩句自佳其善于筆札

題壁有院似禪心靜花如覺性圓清麗可喜

洛川寺觀藍牆粉壁之上題紀殆徧時人以其縱誕有

風子之號焉別傳云疑式雖仕歷五代以心疾閒居故

與顏真卿而加以縱逸既久居洛多遨遊佛道祠遇山

水勝槩輒畱連賞詠有垣牆圭缺處顧視引筆且吟且

書若與神會率寶護之其號或以姓名或稱癸巳人或

稱楊虛白或稱希維居士或稱關西老農其所題後或

真或草不可原詰而論者謂其書自顏中書後一人而

已其伴狂之迹甚著卜第于尹京之側遇入府前輿後

馬猶以為遲乃杖策徒行市人隨笑之嘗迫冬家人未

挾纊會有故人過洛贈以絺五十兩絹百端疑式悉畱

之修行尼舍俾造鞵以施崇德普明兩寺飯僧其家雖

號寒啼饑而疑式不屑屑也畱守聞其事乃自製衣給

米遺之疑式笑謂家人曰我固知畱守必見賙也每旦

乾隆四十九年校刊

舊唐書卷之六

列傳

五



薛仁謙字守訓代居河東近世徙家于汴今爲浚儀人也父延魯仕唐爲汝州長史累贈吏部尚書仁謙謹厚廉恪深通世務梁鄴王羅紹威甚重之累署府職唐莊宗卽位于魏授通事舍人梁開平中三聘于吳得使者之體遷衛尉少卿引進副使累加檢校兵部尚書長興中轉客省使鴻臚少卿出爲建雄軍節度副使進階光祿大夫檢校左僕射改光祿少卿晉天福初授檢校司空河中節度副使歸朝爲衛尉太僕二卿丁繼母憂居喪制滿授司農卿漢乾祐中以本官致仕周初改太子賓客致仕仍加檢校司徒進封侯爵顯德三年冬以疾終年七十八贈工部尚書初仁謙隨莊宗入汴也有舊第爲梁朝六宅使李賓所據時賓遠適而仁謙復得其第或告云賓之家屬厚藏金帛在其第內仁謙立命賓親族盡出所藏而後入焉論者美之子居正皇朝門下侍郎平章事

蕭愿字惟恭梁宰相頃之子也頃明宗朝終于太子少保唐書有傳初愿之曾祖倣唐僖宗朝入相接客之次愿爲兒童戲效傳呼之聲倣謂客曰余豈敢以得位而喜所幸奕世壽考吾今又有曾孫在目前矣愿弱冠舉進士第解褐爲校書郎改畿尉直史館監察殿中侍御



史遷比部員外郎右司郎中太常少卿明宗朝祀太微宮愿醉預公卿之列爲御史所彈左遷右贊善大夫未幾授兵部郎中復金紫丁內艱服闋自左司郎中拜右諫議大夫歷給事中右常侍祕書監改太子賓客廣順元年春卒贈禮部尚書愿性純謹承事父母未嘗不束帶而見然性嗜酒無節職事弛慢爲兵部郎中日常掌告身印覃恩之次頗怠職司父頃爲吏部尚書代愿視印篆其散率如此愿卒時年七十餘其母猶在一門壽考人罕及者

盧損其先范陽人也近世任于嶺表父穎遊宦于京師損少學爲文梁開平初舉進士性頗剛介以高情遠致自許與任贊劉昌素薛鈞高總同年擢第所在相詬時人謂之相罵勝及任贊劉昌素居要切之地而損自異不相親狎時左丞李琪素薄劉昌素之爲人常善待損琪有女弟眇長年婚對不售乃以妻損損慕琪聲稱納之及琪爲輔相致損仕進梁貞明中累遷至右司員外郎唐書成初由兵部郎中史館修撰轉諫議大夫屢上書言事詞理淺陋不爲名流所知清泰中盧文紀作相密與損參議時政初長興中唐末帝鎮河中損嘗爲加恩使副及末帝卽位用爲御史中丞拜命之日以自前



憲司不能振舉綱領俾風俗頽壞乃大爲條奏而有平  
明放鑰日出守端之語大爲士人嗤鄙有頃誤詳赦書  
失出罪人停任晉天福中復爲右散騎常侍轉祕書監  
大失所望卽拜章辭位乃授戶部尚書致仕退居潁川  
時少保李麟年將八十善服氣導引損以麟之遐齡有  
道術酷慕之仍以潁川逼于城市乃卜居陽翟誅茅種  
藥山衣野服逍遙于林圃之間出則柴車鶴氅自稱具  
茨山人晚年與同輩五六人于大隗山中疏泉鑿壑爲  
隱所誓不復出山久之齒髮不衰似有所得廣順三年  
秋卒時年八十餘贈太子少傅

王仁裕字德輦天水人少孤不從師訓年二十五方有

意就學一夕夢剖其腸胃引西江水以浣之又睹水中

砂石皆有篆文因取而吞之及寤心意豁然自是姿性

絕高

案此下有闕文輿地紀勝云王仁裕知貢舉時所  
取進士三十三人皆一時名公卿李昉王溥爲冠

有詩萬餘首勒成百卷目之曰西江集蓋以嘗夢吞西

江文石遂以爲名焉

輿地紀勝仁裕所著有紫泥  
集西江集入洛記共百卷

後爲

兵部尚書太子少保卒

裴羽字用化唐僖宗時宰相贄之子也羽少以父任爲

河南壽安尉入梁遷御史臺主簿改監察御史唐明宗

時爲吏部郎中使于閩遇颶風飄至錢塘時安重誨用



事削奪吳越王封爵羽被留于錢塘經歲不得歸後重  
誨死吳越復通中國羽始得還晉初累遷禮部侍郎太  
常卿廣順初爲左散騎常侍卒贈工部尚書羽之使閩  
也正使陸崇卒于吳越羽載其喪還歸其橐裝時人義  
之

段希堯河內人也祖約定州戶掾贈太常少卿父昶晉  
州神山縣令累贈太子少保希堯少有器局累歷州縣  
唐天成中爲衛州錄事參軍會晉高祖作鎮于鄴聞其  
勤幹奏改洛州糾曹及晉祖鎮太原辟爲從事清泰中  
晉祖總戎于代北一旦軍亂遽呼萬歲晉高祖惑之希

堯曰夫兵猶火也弗戢將自焚遽請戮其亂首乃止明  
年晉祖將舉義于太原召賓佐謀之希堯極言以拒之  
晉祖以其純朴弗之咎也晉祖龍飛霸府舊僚皆至達  
官惟希堯止授省郎而已天福中稍遷右諫議大夫尋  
命使于吳越及乘舟汎海風濤暴起檝師僕從皆相顧  
失色希堯謂左右曰吾生平履行不欺暗室昭昭天鑒  
豈無祐乎汝等但以吾爲託必當無患言訖而風止乃  
獲利涉使迴授萊州刺史檢校尚書右僕射未赴任改  
懷州六年秋移棣州刺史兼權鹽磬制置使少帝嗣位  
加檢校司空開運中歷戶部兵部侍郎漢初遷吏部侍



郎判東西兩銓事國初拜工部尚書世宗嗣位轉禮部尚書顯德三年夏卒于洛陽時年七十有九贈太子少保子思恭右諫議大夫

司徒詡字德普清河郡人也父倫本郡督郵以清白稱詡少好讀書通五經大義弱冠應鄉舉不第唐明宗之鎮邢臺詡往謁之甚見禮遇命試吏于邯鄲歷永年項城令皆有能名長興初唐末帝鎮河中奏辟爲從事未幾徵拜左補闕史館修撰秦王從榮之開府也朝廷以詡爲戶部員外郎充河南府判官秦王遇害以例貶寧州司馬清泰初入爲兵部員外郎晉祖踐阼改刑部郎

中充度支判官樞密直學士由兵部郎中遷左諫議大夫給事中充集賢殿學士判院事轉左散騎常侍工部侍郎歷知許齊亳三州事漢初除禮部侍郎凡三主貢舉自起部貳卿不數年間徧歷六曹由吏部侍郎拜太子賓客世宗卽位授太常卿時世宗留意于雅樂議欲攷正其音而詡爲足疾所苦居多假告遂命以本官致仕顯德六年夏卒于洛陽之私第年六十有六贈工部尚書詡善談論性嗜酒喜賓客亦信浮圖之教漢乾祐中嘗使于吳越航海而往至渤海之中睹水色如墨舟人曰其下龍宮也詡因注香與念曰龍宮珍寶無用俟



迴棹之日當以金篆佛書一帙用伸贊獻泊復經其所  
遂以經一函投于海中俄聞梵唄絲竹之音暄于船下  
舟人云此龍王來迎其經矣同舟百餘人皆聞之無不  
歎訝焉

邊蔚字德昇長安人父操華州下邳令累贈太子少師

宋史邊珣華州鄭人也曾祖頡石

泉令祖操下邳令父蔚太常卿

蔚幼孤篤學有鄉里譽從交辟歷晉陝華三府從事唐莊宗之伐蜀大軍出  
于華下時屬華方闕帥蔚爲記室詔令權領軍府事供  
億軍儲甚有幹濟之稱及明宗入洛遣李冲齋詔于關  
右盡誅闖官冲性深刻而華人有爲闖官所累者冲欲

盡戮之蔚以理救護獲免者甚衆毛璋之鎮邠寧奏爲  
廉判時璋爲麾下所惑有跋扈之意蔚因乘間極言諭  
以逆順之理璋卽時遣其子入貢朝廷以蔚有贊畫之  
效錫以金紫改許州戎判晉天福初自涇州戎幕徵拜  
虞部員外郎鹽鐵判官歷開封廣晉少尹晉少帝嗣位  
拜左散騎常侍判廣晉府事轉工部左右侍郎再知開  
封府事開運初出爲亳州防禦使爲政清肅亳民感之  
歲餘入爲戶部侍郎漢初拜御史中丞轉兵部侍郎太  
祖受命復知開封府事遷太常卿後以足疾辭位顯德  
二年冬卒于家時年七十有一子玘珣俱仕皇朝爲省



郎

王敏字待問單州金鄉人性純直少力學攻文登進士第後依杜重威凡歷數鎮從事漢初重威叛于鄴時敏爲畱守判官嘗泣諫重威懇請歸順重威始雖不從及其窮也納敏之言以其城降時魏之饑民十猶四五咸保其餘生者敏之力也入朝拜侍御史世宗鎮澶淵太祖以敏謹厚遂命爲澶州節度判官及世宗尹正王畿改開封少尹世宗嗣位權知府事旋拜左諫議大夫給事中遷刑部侍郎敏常以子壻陳南金薦于曹州節度使李繼勳表爲記室其後繼勳僨軍于壽春及歸闕而無待罪之禮世宗以繼勳武臣不之責也因遷怒南金謂其裨贊無狀乃黜之敏由是連坐遂免其官歲餘復拜司農卿顯德四年秋以疾卒



舊五代史卷一百二十八

舊五代史卷一百二十八攷證

周列傳八楊凝式傳歷右常侍工戶二部侍郎 案別

傳作工禮戶三部侍郎

年八十五 案別傳作八十二

裴羽傳贈工部尚書 案歐陽史作戶部尚書

段希堯傳河內人也 案宋史段思恭傳作澤州晉城

人



舊五代史卷一百二十八攷證

舊五代史卷一百二十九

宋門下侍郎參知政事監修國史薛居正等撰

周書第二十

列傳九

常思字克恭太原人也父仁岳河東牙將累贈太子太師唐莊宗之爲晉王也廣募勝兵時思以趨悍應募累從戎役後爲長直都校歷捧聖軍使晉初遷六軍都虞候漢高祖出鎮并門奏以思從行尋表爲河東牢城都指揮使以勤幹見稱漢國初建授檢校太保遙領鄧州漢有天下遷檢校太尉昭義軍節度使乾祐初李守貞



叛于河中太祖征之朝廷命思帥部兵以副焉旣而御衆無能勒歸舊藩思在上黨凡五年無令譽可稱唯以聚斂爲務性又鄙恠未嘗與賓佐有酒肴之會嘗有從事欲求謁見者思覽刺而怒曰彼必是來獵酒也命典客者飲而遣之其鄙恠也如是太祖受命就加平章事初太祖微時以季父待思及卽位遣其妻入覲太祖拜之如家人之禮仍呼曰叔母其恩顧如是廣順二年秋思來朝加兼侍中移鎮宋州三年夏詔赴闕改授平盧軍節度使思將赴鎮奏太祖云臣在宋州出鎮得絲十餘萬兩謹以上進請行徵督太祖領之尋詔本州折券

以諭其民及到鎮未幾染風痺之疾上表請尋醫旣而昇疾歸洛顯德元年春卒年六十有九贈中書令

翟光鄴字化基濮州鄆城人父景珂倜儻有膽氣梁貞明初唐莊宗始駐軍于河上景珂率聚邑人守永定驛固守踰年後爲北軍所攻景珂戰歿衆潰光鄴時年十歲爲明宗軍所俘以其穎悟俾侍左右字之曰永定旣冠沈毅有謀蒞事寡過明宗卽位特深委遇累遷至皇城使檢校司空長興中樞密使安重誨得罪時光鄴與中官孟小僧頗有力焉居無何出爲耀州團練使清泰初入爲左監門衛大將軍晉天福中歷棣沂二州刺史



西京副留守開運初授宣徽使楊光遠叛滅青州平除  
爲防禦使朝廷以兵亂之後人物彫弊故命光鄴理之  
光鄴好聚書重儒者虛齋論議惟求理道時郡民喪亡  
十之六七而招懷撫諭視之如傷故朞月之間流亡載  
輯契丹入汴僞命權知曹州李從益假號以光鄴明宗  
舊臣署爲樞密使漢祖至汴改左領衛大將軍乾祐初  
遷右金吾衛大將軍充街使檢校太保太祖踐阼復授  
宣徽使左千牛衛上將軍檢校太傅數月兼樞密副使  
會永興李洪信入朝代知軍府事廣順二年十月卒于  
長安時年四十六光鄴有器度慎密敦厚出于天然喜

慍不形于色事繼母以孝聞兄弟皆雍睦雖食祿日久  
家無餘財任金吾日假官屋數間以蔽風雨親族累重  
糲食纔給人不堪其憂光鄴處之晏如也賓朋至則貰  
酒延之談說終日晷無厭倦士大夫多之及權知京兆  
以寬靜爲治前政有煩苛之事一切停罷百姓便之及  
病甚召親隨于卧內戒之曰氣絕之後以尸歸洛不得  
于此停留慮煩軍府言訖而終京兆吏如喪所親或有  
以漿酒遙奠者樞密使王峻素重光鄴且欲厚卹其家  
爲之上請故自終及葬所賜賻賵幾數千計詔贈太子  
少師光鄴膚革肥皙善于攝養故司天監趙延乂有袁



許之術嘗謂人曰翟君外厚而內薄雖貴而無壽果如其言

曹英字德秀舊名犯今上御名故改焉本常山鎮定人父全武事趙王王鎔爲列校英因得隸于鎔之帳下及張文禮之亂唐莊宗奄有其地乃錄鎔之左右署爲散指揮使明宗卽位英侍于仗下問其祖考英以實對明宗曰乃朕之舊也擢爲本班行首每加顧遇晉天福中遷弩手軍使平張從賓于汜水以功授本軍都校漢初改奉國軍主加檢校司徒兼康州刺史乾祐初李守貞據河中叛授行營步軍都校河中平遷本軍廂主領岳

州防禦使隨太祖在魏爲北面行營步軍都校從平內難國初以翊戴功授昭武節度使檢校太傅侍衛步軍都指揮使二年春總兵討慕容彥超于兗州梯衝塹壘頗有力焉夏五月太祖親征因併兵攻陷其城及凱旋領彰信軍節度使典軍如故世宗嗣位加同平章事授成德軍節度使車駕自太原迴加兼侍中顯德元年冬卒于鎮時年四十有九制贈中書令英性沈厚謙恭有禮雖在席之際接對賓客亦未嘗造次及卒搢紳之士亦皆惜之

李彥頽字德循太原人也本以商賈爲業太祖鎮鄴賓



之左右及卽位歷綾錦副使推易使世宗嗣位以彥頽  
有舊超授內客省使未幾知相州軍府事尋改延州兵  
馬畱後到鎮頗以殖貨爲意窺圖贖利侵漁蕃漢部人  
羣情大擾會世宗南征蕃部結聚圍迫州城彥頽閉壁  
自守求援于隣道賴救兵至乃解世宗不悅徵赴京師  
然猶委曲庇護竟不之責尋爲西京水南巡檢使居無  
何命權知泗州軍州事改滄州兩使畱後彥頽到任處  
置乖方大爲物情所鄙顯德六年秋受代歸闕遇疾而  
卒時年五十有二

李暉字順光瀛州東城人弱冠應募于龍驤軍漢祖領

河東暉請從因得署爲河東牙將漢有天下授檢校司  
徒大內皇城使未幾遷宣徽南院使乾祐初拜河陽節  
度使檢校太傅太祖登極加同平章事尋移鎮滄州顯  
德元年就加兼侍中二年秋以世宗誕慶節來朝改邠  
州節度使五年移鎮鳳翔歲餘卒于鎮優詔贈中書令  
暉之儀貌不及于常人而位極將相年登耳順袁許之  
術夫何恃哉然性貪鄙而好小惠以邀虛譽故在河陽  
及滄州日民皆詣闕請立碑以頌其美識者亦未之許  
也

李建崇潞州人少從軍善騎射初事唐武皇爲鐵林都



將轉突騎飛騎二軍使從莊宗攻常山安巴堅來援莊宗率親軍千騎遇于滿城兵少爲契丹所圍時建崇爲親將與契丹格鬪自午至申會李嗣昭騎至契丹乃解去同光中自龍武捧聖都指揮使出歷襄秦徐雍都指揮使建崇性純厚處身任遇不能巧宦以致久滯偏裨明宗嘗掌牙兵與建崇共事及卽位甚愍之連授磁沁二郡入晉爲申州刺史天福七年冬襄州安從進搆逆率衆寇南陽時建崇領步騎千餘屯于葉縣開封尹鄭王遣宣徽使張從恩皇城使焦繼勳率在京諸軍會建崇軍拒賊至湖陽縣之花山遇從進軍建崇接戰大敗

之以功授亳州團練使襄陽平遷安州防禦使歷河陽邢州兵馬畱後漢初入爲右衛大將軍年逾七十神氣不衰建崇始自代北事武皇至是四十餘年前後所掌兵麾下部曲多至節鉞零落殆盡惟建崇雖位不及藩屏而康強自適以至耆耄太祖卽位授左監門衛上將軍廣順三年春卒贈黔南節度使

王重裔陳州宛邱人父達歷安均洛三州刺史因家于洛重裔幼沈厚有勇善騎射年未及冠事莊宗爲廳直管契丹直從安汴洛累爲禁軍指揮使晉天福中鎮州安重榮謀叛稱兵指闕朝廷命杜重威率師拒之賊陣



于宗城東晉遣騎軍擊之再合不動杜重威懼謀欲抽  
退重裔曰兵家忌退但請公分麾下兵擊其兩翼重裔  
爲公陷陣當其中軍彼必狼狽矣重威從之重榮卽時  
退蹙遂敗以功遷護聖右廂都指揮使領費州刺史漢  
初仍典禁軍從征鄴都平遷深州刺史淮夷以李守貞  
故數侵邊地以重裔爲亳州防禦使又令于徐州巡檢  
兼知軍州就加檢校太傅太祖踐阼加爵邑改功臣廣  
順元年夏以疾卒年五十有三贈武信軍節度使  
孫漢英太原人也父重進事唐武皇莊宗爲大將賜姓  
名存進唐書有傳漢英少事戎伍稍至都將嘗爲東面

馬步軍都指揮使清泰初興元節度使張虔釗失軍于  
岐下遂以其地西臣于蜀漢英兄漢韶時爲洋州節度  
使因茲阻隔亦送款于蜀由是漢英與弟漢筠久之不  
調漢乾祐中太祖西征蒲雍以漢英爲絳州刺史檢校司  
中指使蒲雍平班師隱帝以漢英爲絳州刺史檢校司  
徒廣順元年冬卒于都

許遷鄆州人也初爲本州牙將性剛褊漢乾祐初爲左  
屯衛將軍與少府監馬從斌同監造漢祖山陵法物節  
財省用減數萬計改左監門大將軍又加檢校司空漢  
末權知隰州太祖踐阼劉崇遣子鈞率兵寇平陽路由



于隰賊衆攻城城中兵少遷感激指諭士鬪兼倍賊衆傷夷尋自退去太祖降詔撫諭正授隰州刺史遷切于除盜嫉惡過當或釘磔賊人令部下巒割誤斷不合死罪人其家詣闕致訟詔下開封府獄時陳觀爲知府素與遷不協深劾其事欲追遷對訟太祖以事狀可原但罷郡而已遷既奉朝請因大詬陳觀謂王峻曰相公執政所與參議宜求賢德如陳觀者爲儒無家行爲官多任情苟知其微屠沽兒恥與爲侶況明公平峻無以沮之既而嬰疾請告歸汶上而卒

趙鳳冀州棗強縣人幼讀書舉童子既長兇豪多力以

殺人暴掠爲事吏不能禁安重榮鎮常山招集叛亡鳳乃應募既而犯法當死卽破械踰獄遁而獲免天福中

趙延壽爲契丹鄉導歲侵深冀鳳往依焉宋史荆罕儒傳罕儒少無

賴與趙鳳張輦爲羣盜晉天福中相率契丹主素聞其

策黠署爲羽林軍使累遷羽林都指揮使常令將兵在

邊貝冀之民日罹其患晉末契丹入洛鳳從至東京授

宿州防禦使漢祖卽位受代歸闕尋授河陽行軍司馬

乾祐初八爲龍武將軍丁父憂起復授右千牛衛大將

軍漢末都城變起兵集之夜無不剽之室唯鳳里閭兵

不敢犯人皆服其膽勇廣順初用爲宋亳宿三州巡檢



使鳳出于伏莽尤知盜之隱伏乃誘致盜魁于麾下厚待之每桴鼓之發無不擒捕衆以爲能然平民因捕盜而破家者多矣鳳善事人或使臣經由靡不傾財厚奉故得延譽而掩其醜迹太祖聞其幹事用爲單州刺史旣剛忿不仁得位愈熾刑獄之間尤爲不道常抑奪人之妻女又以進奉南郊爲名率斂部民財貨爲人所訟廣順三年十二月詔削奪鳳在身官爵等令賜死

齊藏珍少歷內職累遷諸衛將軍前後監押兵師在外頗稱幹事然險詖無行殘忍辯給無不畏其利口廣順中奉命滑州界巡護河隄以弛慢致河決除名配沙門

島世宗在西班時與藏珍同列每聆其談論或剖判世務似有可采及卽位自流所徵還秦鳳之役令監偏師及淮上用兵復委監護與軍校何超領兵降下光州藏珍欺隱官物甚多超以爲不可藏珍曰沙門島已有屋數間不妨再去矣其不畏法也如此世宗旣破紫金山砦追吳寇至渦口因與藏珍言及克捷之狀對曰陛下神武之功近代無比于文德則未光世宗領之又問以揚州之事對曰揚州地實卑濕食物例多腥腐臣去歲在彼人以鱠魚饋臣者視其盤中虬屈一如蛇虺之狀假使鸛雀有知亦應不食豈況于人哉其敷奏大率多



此類聞者無不悚然一日又奏云唐景思已爲刺史臣猶未蒙聖澤世宗俛而從之時濠梁未下卽命爲濠州行州刺史及張承德與李重進有間言藏珍嘗游說重進洎壽陽兵迴諸將中有以藏珍之言上奏者世宗怒急召赴闕四年夏以其冒稱檢校官罪按其事而斃之蓋不欲暴其惡跡也

王環本真定人唐天成初孟知祥鎮西州環往事之及知祥建號環累典軍衛孟昶嗣位環常宿衛于中顯德二年秋王師西伐時環爲鳳州節度使初偏師傅其城下爲環所敗裨將胡立爲環所擒是冬王師大集急攻

其城蜀之援兵相次敗走環聞之守備愈堅王師攻擊數月方克城陷環就擒及到闕世宗以忠于所事釋其罪授右驍衛大將軍四年冬世宗南征環隨駕至泗州遇疾而卒

張彥超本沙陀部人也素有郤克之疾時號爲跛子初以騎射事唐莊宗爲馬直軍使莊宗入汴授神武指揮使明宗嘗以爲養子天成中擢授蔚州刺史素與晉高祖不協屬其總戎于太原遂舉其城投于契丹卽以爲雲州節度使契丹之南侵也彥超率部衆頗爲鎮魏之患及契丹入汴遷侍衛馬軍都校尋授晉昌軍節度使



漢高祖入洛彥超飛表輸誠移授保大軍節度使乾祐初奉詔歸闕止奉朝請而已太祖自鄴入平內難隱帝令彥超董騎軍為拒劉子陂兵亂彥超先謁見太祖廣順中授神武統軍顯德三年冬以疾終于第制贈太子太師

張穎太原人駙馬都尉永德之父也

宋史列傳永德并州陽曲人家世饒

財曾祖丕尚氣節後唐武皇鎮太原急于用度多嚴選富家子掌帑庫或調度不給即坐誅沒入貲產丕為之滿歲府財有餘宗人政當次補其任率族屬泣拜請丕濟其急丕又為代掌一年鄉里服其義累為藩郡列校由內職歷諸衛將軍國初以戚里之故自華州行軍司馬歷郢懷二州刺史遷安州防禦使穎性下急

峻刻不容人之小過雖左右親信亦皆怨之部曲曹澄有處女穎逼而娶之澄遂與不逞之徒數人同謀害穎中夜挾刃入于寢門執穎而殺之遂奔于金陵世宗征淮南以永德之故遣江南李景令執澄等送行在及至世宗以澄等賜永德俾甘心而戮之

劉仁贍畧通儒術好兵書在澤國甚有聲望吳主知之累遷為偽右監門衛將軍歷黃袁二州刺史所至稱治洎李景僭襲偽位俾掌親軍遷鄂州節度使居數年復以兵柄任之改壽州節度使及王師渡淮而仁贍固守甚堅洎世宗駐蹕于其壘北數道齊攻填塹陷壁晝夜



不息如是者累月世宗臨城以諭之而仁贍但遜詞以謝及車駕還京命李重進總兵守之復乘間陷我南砦自是圍之愈急城中飢死者甚衆三年冬淮寇復來救援列砦于紫金山夾道相屬纍然數十里垂及壽壁而重進兵幾不能支世宗患之遂復議親征車駕至壽春命今上率師破紫金山之衆擒其應援使陳承昭以獻仁贍聞援兵旣敗計無所出但扼吭浩嘆而已會世宗以紫金山之捷飛詔以諭之時仁贍卧疾已亟因翻然納款而城內諸軍萬計皆屏息以聽其命及見于行在世宗撫之甚厚賜與加等復令入城養病尋授天平軍節度使兼中書令制出之日薨于其家年五十八世宗聞之遣使弔祭命內臣監護喪事追封彭城郡王後以其子崇讚爲懷州刺史仁贍輕財重士法令嚴肅重圍之中其子崇諫犯軍禁卽令斬之故能以一城之衆連年拒守逮其來降而其下未敢竊議者保其後嗣抑有由焉崇讚仕周累爲郡守幼子宗諒後自江南歸于本朝亦位至省郎



舊五代史卷一百二十九

舊五代史卷一百二十九攷證

周列傳九張頴傳國初以戚里之故自華州行軍司馬

歷郢懷二州刺史遷安州防禦使

案宋史作事晉

爲安州防禦使與是書異

劉仁贍傳時仁贍卧疾已亟因翻然納款 案歐陽史

云仁贍固守三月病甚已不知人其副使孫羽詐爲

仁贍書以城降是仁贍未嘗親納款于周也是書作

翻然納款蓋仍周實錄原文未及釐正

安巴堅舊作阿保機今改



舊五代史卷一百二十九攷證

舊五代史卷一百二十九攷證



